

Wahyu We Yohanesi

Kaiwo dedung we Wahyu We Yohanesi

Kaiwo anatu nei mani kariri fi fubao Yesus Kristus deinawiai we ne inontaraio wonong fino Yohanesi. Ampefe Yohanesi nani soi kaririai.

Rabuang bo soi kaiwofo mani inontarai Kristeni fosa esodai dadira paria weo eroaso Seng Yesusi fefe. Na rahida bonani mani parenta Roma foi demi we kaiwasafoi kiai we esomi we mananu Roma foi, mano esahui we Kaisari, ambori esahui we ene seng dine. Wape inontarai Kristeni fosa wiwo esomi wei kaha, mae esomi terai we Seng Yesus Kristusi, pariao parentafoi miunsa kontai. Wape Kristeni manea siai fosa ematai tuti esu to fui weru ene eroasofo. Yohanesi soi kaiwo anatu nei wesa ambori ewemambiriu aha weo etoaria mutu na eroaso Yesusi fo.

Fi fuba na kaiwonei wefiainawiai ete fiatioai, amani fio Seng Yesus Kristusi deinawiai we Yohanesi we detioai. Na kaiwone mani soi na kaiwo netawea fea bitoya paria, ambori fio kasau kaharai fo, na rahida bo kawariaifa fo, kasau we tata ki. Finani kiai inontarai eroaso fosa na fafong nanai ewaitawanai, wape na fui nini mani wiwo kasau we tata kaha. Wape fio kasau mani, masino inontarai Kristeni ne tata tasodai dadira bitoya na nunei, tonana ki wape tasu to fui fanai, taroaso Yesusi mutu tuti tarariati pampang ki. Weo na fui wana mani Seng Yesusi ambori miungno ne aitetafosa kiai tuti wemananu we nunei sentenang. Tuti tata kontai tawemananu riati rai.

Kaiwo na suratinei deto kutuai tonina:

1:1-4 Kaiwo reantenang.

1:9-3:22 Fiatioai bo reantenang foi.

1:9-20 Yesusi atioai we Kaisung Inontaraio doa rahanai na pelita aweng itu fo.

2:1-3:22 Yesusi ne kaiwo medurai we jematifosa na bendari itu fo.

4:1-16:21 Fiatioai bo boru foi.

4:1-5:14 Yesusi, Domba Antungno doa rurang Allai ne kadera mananu foi na rorafaisi.

6:1-8:5 Domba Antung foi fiosabu segeli itu fo.

8:6-11:19 Wewaifosa ebui songgeri itu fo.

12:1-16:21 Fiainawiai ituo deinawiai kariri fio ambori kawaria fo.

17:1-21:8 Fiatioai bo botoru foi.

17:1-19:20 Yohanesi deti wiwing diru manei, wonong fino Babeli.

19:11–21:8 Yesusi kiawariai we mano dautai na kuda tuti kiraikobuo ne aitetafosa kiai.

21:9–22:5 Fiatioai bo boa foi.

Yohanesi deti kadawingno Domba Antung foi dauti fi, wonong fino Yerusalemi Waworu.

22:6–21 Kaiwo Wefuiai.

Kaiwo kariri bukunei

1 ¹Kaiwo na bukunei mani dotu kariri fio Yesus Kristusi deinawia fo, amani fio Allai dohonai we Yesus Kristusi ambori deinawiai we ne womingnesa, kariri fianai aino katu mani kawaria fo. Ampafe Kristusi demi ne wewaifo da we ne woming Yohanesia we deikariri fi ambori kawariai nanai wei.^a ²Yohanesi deiriri kariri fifuba deti teri na urengfo nani kiai, amani kariri Allai Kaiwo medura fo tuti kariri fio Yesus Kristusi deinawiai weia fo. ³Weo waroi ahang kahai mae fininai kiai ambori kawariai ki. Mano deto kaiwo kariri fi ambori kawaria fo ninai mani, Allai mioani ki. Tuti mano etaramioai esoniai na enemirorongfo tuti etohong kariria fosa, ea kontai Allai mioansa ki.

Yohanesi dohong mahikaifea we jemati itu fo

⁴Weo doroi mea na jemati ituo na nu Asia wai mea. Yau Yohanesi yutang we Allai, mano niyai kawuru na reantenang pari foa foi, mano niyai pampang paria sobu rahida bonini, tuti niyai pampang we fitawafa foi, kadono mioang mea, amani dohong ne bengfo arora we mea tuti dohong mea menumiruinso ne maifo. Kadono Allai Nuaninu ituo etoari na arongreafo, kefang we ne kadera mananu foi fosa, emoang mea kontai. ⁵Tuti kadono Yesus Kristusi, mano deiriri kaiwo wetarai fo na mai foi, mano reantenang suwi fafong na marareha rorong fo meai, mano wemananu fuba we mananu na nunei fosa kiai foi, kadono mioang mea tonanai kontai.

Yesusi enewawu tata donio mireha we tata ambori na ne rikao tiwowu we tata fo feriri tata weru tane sasarinei. ⁶Tuti yuai tata we ne inontarai na ne Mananu rorong fo, tuti taweimami we tarufi we tamangno Allai, amani tane tarai kariri imamifosa, tariwang Allai tamadu ne kaiwofo we kaiwasanei, tuti taha inontarai ene korbani tuti ene nadifo tatohonai we Allai. Yesusi tataparandini tuti todoni kontai andi wemananu we fitawafa ne. Antu!

⁷Mewati, i da na kafafe rorong fo ma ki. Mandoni kontaio ambori detioi ki, mano raminde etisani fosa tuti inontarai siai kontai ambori

^a 1:1 Kaiwo 'Wahyu' ne mani, neta we fiainawiai. Ampafe Yesusi dohong wahyu we Yohanesi, nana mani deinawi fi ambori kawaria fo we Yohanesi detioa fo.

ewatioi we da ma fo. Rabuang bonani, kaiwasa fuba nunei kiai ambori ematai tuti esaia etaidu ki. Tarai! Antu!

⁸Seng Allai medu deyo, “Yau mani *Alfa* tuti *Omega* di yau.^b Yau inayai kawuru na reantenang pari foia foi, tuti inayai pampang paria sobu rahida bonini, tuti inayai pampang we fitawafa foi. Tuti yau iweMananu Fuba Sewa ne.”

Yesusi demi Yohanesi we soi kariri fi detioa fo

⁹Yau Yohanesi, mene doroi na taroaso Kristusi ruhia ne, tuti mano isodai dadira rorong fo toyari mea, tuti toyari mea kontai itawang yau na dadira rorong nanai, weo taminohi na Yesusi ne Mananune. Ehabi yau to nu Patmosi ma iwatai nai, weo iwuwu Allai ne Kaiwo waworu ne, amani kariri todoni kaiwasa esobu fariri na eroaso Seng Yesusi, tuti kaiwo Yesusi medura fo fefe. ¹⁰Tete Sempaaisi ne Rahida dine, Nuaninu Mirarebana nei sensoni yau, ainanaya tarahuo manei medu na kuruhune, na rawafui fiabai toyario songgerifi wedotu fenana. ¹¹Medu we yau deyo, “Fianai aino botioai ninai woi na buku bei tuti bonatuai we jemati itu ninai, amani we jemati na bendari Efesusi, jemati na Simirna, jemati na Pergamusi, jemati na Tiatira, jemati na Sardisi, jemati na Filadelfia, tuti jemati na Laodikia.”

¹²Ampafe yarabera yau iwati to kuruhufuia, we iwati we mandoni dino medu tonanai we yau ne. Ainanaya iwati katai we pelita suang nai itu, finanai enari na emasi kai. ¹³Tuti iwati inontarai manei doa rahanai na pelita aweng itu fo, ne tarai toyari Kaisung Inontarai nei. Ansung satari foi fiabai deuroia sobu awerengfo tuti na ne ansung arong fo soru ireu aburung enariri na emasi bei. ¹⁴Nungfoi tuti nurandaungfo bua karofari toyari kafe bua. Urengfo suru uransairai toyari adia fiabai paria. ¹⁵Awengfo dedori toyario besi kasoia dedori fenanai. Rawafuifo nubuyai toyari mereha deda na dofiro. ¹⁶Warang domoya foi yu awaha itu tuti sondu reisa kurubong tuti reisa reng bei kiawariai na borongfo. Urengfo sambewarai toyari wo rahida rabuang.

¹⁷Na kutu iwatioi nanai, itawai aweu isangkapa awehubuka na arongreafo, nehu tarai toyari inontaraio mireha, wiro ikabera yau ahang kaha. Wape suba warang domoya foi ma yu yau, tuti medu we yau deyo, “Mutai fanai! Yau mani *Reantenang Pari* di yau tuti *Fui Pari* di yau. ¹⁸Tuti mano *Darang Pampang* di yau. Raminde imerehara, wape boti ninaia mani yarang we fitawafa. Aisu we rahutu Marareha rorong fo tuti Soroha rorong fo nayai na warahu rorong ne ampa.

¹⁹Ampafe woi kariri fianai aino botioai nanai, amani fio kawariai kawurua fo tuti ne ambori kawariai aha fo. ²⁰Tuti fi toyari kaiwo

^b 1:8 Ne tarai kariri A tuti Z na kaiwo ambe.

adiwarai kariri awaha ituo botioai na warahu domoya fininai tuti pelita aweng itu fo enariri na emasifo mani, deinawi kariri fininai: Awaha itu fo yiwanso wewai ituo ewaitawang wedua jemati itu fo saine. Tuti fi pelita doa nayai itu fo mani deinawio jemati itu fo.”

Kaiwo arerai we jemati na Efesusi

2 ¹Mayeai Yesusi medu we yau aha deyo, “Yohanese, woi nehu kaiwo imadura ne we wewai na jemati Efesusi foi tonina:

Mano yu awaha itu na warang domoya foi tuti da rahang pelita aweng ituo enari na emasi fo, ne kaiwo arerai we jematiwai ainina.

²Iwaitawang kariri fianai aino menari wa ampa, amani merurai merufi paria tuti metawang mea na dadira rorong fe wa, tuti wiro memaya we mewati inontarai eharira fosa euremifo kaha fo. Kontai iwaitawanai kariri todoni merurai we mewaitawang kariri inontarai epampamu we eteyo ea mani rasuli saine fosa. Eteyo emadu fieai na Sempaisi wonongfo wape mewati karirisa sauarai ambori mewaitawanai weo ea tonana kaha. ³Iwaitawanai we wonohunei wedaya mesodai dadirafo, amani mesobu dadira bitoya na Yahudifosa weo mewuwu kariri yau fefe. Wape metawang mea pampang tuti wiro mesu to fui kaha, mae meraria yau pampang. Finani kiai dohong yau iparaise ria mea ampa.

⁴Tonanai ki, wape iparaise kahai we fisarawafeai kontai menari wa, amani wiro menemiwawu yau kariri reantenang meroaso yau fo ahang kahai. ⁵Ampafe mearomioaifa, weo ne tonanane wedaya mehatai waroi weru yau ampa. Ampafe metarabera mea weru mene sasariwai tuti menari kariri fianai aino na reantenangfo menaria nanai. Bereri mani, ambori ira mau we ifating mene fio katai pelita doa nai wai weru katai wai ki. ⁶Wape iwati fi beng feai kontai na mea, amani menemirireu fio Nikolasi ne inontarai erariati fosa enari fo, kariri yau kontai we enehurireuwa fo.

⁷Mandoni dino wetarang mani, tarao kaiwo Allai Nuaninufoi medurai we jemati kiai nina. Mandoni dino doara mutu dirapa Saminseni pariao wereafo mani, ambori iroa wei we dang aibongno dohoni minohi darang wenumainu ria Allai na Waidani ki.”

Kaiwo arerai we jemati na Simirna

⁸Yesusi medu we yau Yohanese aha ma, deyo, “Woi we wewaio na jemati na Simirna foi toninai:

Mano *Reantenang Pari* foi tuti *Fui Pari* foi, mano mireha ampa tuti suwi aha ne, ne kaiwo finina; ⁹Iwaitawang dadira bitoya mesodaira wa tuti mene pari fi wa ampa. Wape imadurai we mea mau yeyo na Sengnei mani inontarai mene fi di mea paria. Tuti iwaitawanai kontai ampa we mesobu kaiwo kahera wai paria, ria inontarai eteyo ea mani inontarai Yahudi tarai saine fosa. Ea mani

eteyo etohong kariri Musai ne Hukumifo na mai, wape eteiaya yau Yesusi nehu Kaiwofo, amani Kaiwo kariri todoni ifariri kaiwasafu na imereha wesa fo. Emadu funomai tonanai, weo ea mani, Yahudio etohong kariri Allai ne Kaiwofo na mai saine kaha, mae Saminseni ne inontarai saine. ¹⁰Dohonao mematai we dadirao katu wori mesodaira fo fe. Weo yeisaharai we mea, Saminseni ambori wedaya inontarai eweiteta we mea fosa etafu manea na mea, esoasa to aitamu rorong fo ki. Tuti ambori mesodai dadirafu paria rahida sura. Niari tonanai we meafu we ambori deo wedaya metawai na mene meroasoafu. Wape yeyo todoni kontai meroaso yau terai pampang, pariao masino memarareha kontai ki, tuti ambori yohongno fiembaitafu we mea ki, amani meminohi metarang we fitawafa.

¹¹Mandoni dino wetarang mani tarao kaiwo Yesusi Nuaninufi medurai we jemati kiai nina. Mandoni dino doara mutu dirapa Saminseni pariao wereafu mani, wenani wiwo sodai Marareha Weberu fo kaha.”

Kaiwo arerai we jemati na Pergamusi

¹²“Woi weo wewai na jemati Pergamusi toninai:

Mano yu sondu reisa tuti reng boru foi ne kaiwo we jematiwai finina;

¹³Iparise we mea. Iwaitawanai we katai meminohi nai wai mani katai Saminseni wemananu nai dine. Tonanai ki, wape mesomi we yaua mutu, tuti mefara yau kaha. Tuti mewati terai we emung Antipasi, nehu inontarai somi we yau na mai tuti deiriri wonohu wai. Mewatisa emuni na mene bendariwai, katai Saminseni wemananu nai wai tonanai ki, wape meroasoai mutu, wiwo mesu to fui kaha.

¹⁴Tonanai ki, wape iparise kahai we fisarawai beiru teaio menari wa, amani inontarai maneiru tea na mea ene tarai kariri Bileami.^c Bileami nini na fafongfa deunau Baraki we weanggari inontarai Israeli fosa we etaukaha sasarifoi, amani etang fio esomi tutirai we aririwangfosa tuti emaninawa funomai. ¹⁵Mano nanisa kontai etohong kariri Nikolausi tuti ne inontarai erariati fosa ene aunau karira fo. ¹⁶Ampafe metarabera mea weru mene sasariwai. Bireri mani, waroi ahang kahai mae ambori ira mau tuti imunsa na sondu kiawariai na borohu fenini ki.

¹⁷Mandoni dino wetarang mani, tarao kaiwo Yesusi Nuaninufi medurai we jemati kiai nina. Mandoni dino doaria mutu, dirapa Saminseni pariao wereafu mani, ambori iroa wei we dang fiang mannao dadiwa fo, amani fiang na Waidani, tuti yohong kamiei biuao isoi wang waworu fo nai foi wei ki. Wang nanai wiwo manei siai deitawana kaha, mae mano sobu kamiefoi meiri andino deitawana ne.”

Kaiwo arerai we jemati na Tiatira

¹⁸Mayeai Yesusi medu we yau aha deyo, “Woi we wewai na jemati Tiatira foi toninai:

^c 2:14 Bilangan 22:5, 7, 25:1-3, 31:16; Ulangan 23:4

Seng Allai ne Kaisungno urengfo uransairai ne tarai toyari adia denggararu paria tuti awengfo dedori toyari besi kasoia dedori foi, ne kaiwo we jematiwai finina; ¹⁹Iwaitawang fianai aino menari wa ampa, amani kariri menemiwawuwa, meroaso yau wa, mefata inontarai wa tuti metawang mea na dadira rorong fe wa. Tuti iwaitawanai kontai we na fui ninai fi menari wa nanai fuba pari sewa reantenang meroaso fo.

²⁰Tonanai ki wape iparaise kaha we fisarawafeai menari wa, amani meroa we Isebeli, wiwingno deyo i mani Allai ne nabi demi ma dine foi. Wiwing nani sofa wawera nehu inontarai erufi we yau nesa bitoya paria tuti deunasa we emaninawa tuti etangno fiang etohonai we aririwangfesara fo. ²¹Yohong rahida wei kawuru we daraberahi weru ne sasari maninawa nani faini, manamo merira. ²²Ampefe ikafa kanggunia meninang ambori sodai dadirafo, tuti mandoni saino enari maninawafo riati mani, yohonsa esodai dadirafo pari riati kontai. Tuti efotou enari sasarifo kaha mani, ambori esodai aiboi yohonai tonanai wesa fo ki. ²³Ne inontarai erariati fosa, ahusa we ne arikangfosa, kontai imunsa weruai. Inari tonanai ambori jematinei kiai ewaitawanai we yauno iwati bau kaiwasa enumikamiefoi tuti enemirorongfoi ne. Tuti ewaitawanai we yohong aiboifo we mansiari-mansiari kariri sasari enariri foi ki.

²⁴Wape mea siai na jemati Tiatira wai, wiro metohong kariri Isebeli ne aunau kerira nani kaha, tuti wiro merurai we mewartawang Saminseni ne aunau werorong nani kaha. Fianai aino menari tonana fo demoyarai, wiro yohong kaiwoariri siai feai we metohong kaririai ahang kaha. ²⁵Mae fianai aino mesobuai kawurua fo mani, amani mene meroaso yau wa, merutawanaia mutu paria sobu rahida yarabera yau nai aha mau foi.

²⁶⁻²⁷Mandoni dino doara mutu dirapa Saminseni pariao wereafo mani, tuti dohong kariri fianai aino yawi wea fo paria werea naya fo mani, ambori yohong mambiriufu wei ki, amani mambiriuo Dai na rorafaisi dohonai we yau fo. Ne tarai toyari nabi fafong fasa emadu kariri Mananu Mampariri foi ne mambiriufu eteyo,

‘I ambori wemambiriu we yu kaiwasa na nunei fosa kiai,
tuti disang kanggunsa na ne aitatohi besi foi

emangganggung toyari isang kanggung awaing fenanai ki.’^d

²⁸Tuti yohongno awaha Ampari wei we fiembaitai kontai ki.

²⁹Mandoni dino wetarang mani, tarao kaiwo Yesusi Nuaninufi medurai we jemati kiai nina.”

Kaiwo arerai we jemati na Sardisi

3 ¹Mayeai Yesusi medu we yau aha, deyo, “Woi we wewai na jemati Sardisi foi tonina:

^d 2:27 Masmuri 2:8-9

Mano yu Allai Nuaninu itu fo tuti yu awaha itu fo na warangfo, ne kaiwo medura finina. Iwaitawang fianai aino menari wa ampa. Kaiwasa eteyo inontarai metarang di mea, amani meroaso yaua mutu. Wape yeitawanai wirow tonanai kaha, mae memararehara, amani mene meroasofo tupa dawohi arorawa, toyari metawera weru meroaso yau fo tuti menemitawanai we metohong kariri Hukumi Musa soi foi ambori feriri mea. ²Metoabari mea! Merurai tuti mene meroasofo adareti mareha nanai ambori mireha fanai, mae darang aha. Weo iwati fio menari wa wirow mai na Dai Allai arongreafow kaha. ³Ampefe mearomio kariri fianai aino raminde nanai mesobuai tuti metaramiofo nanai, amani kaiwo kariri todoni ifariri mea na meroaso yau fo, wirow na metohong kariri Hukumi Musai soi fo nani kaha. Metohong kariri finanai tuti meroaso yau terai we ifariri mea, tuti metarabera mea weru mene sasario menemitawang Hukumi Musai soi foi we feriri mea fo. Wape metena pampang tuti metoabari mea kaha mani, ira tantuma mau rai, nehu tarai toyari inontarai da we kiamananapi, tuti wirow mewartawang kariri rahida bodoni dino ira tantuma nai tonanai mau ne kaha.

⁴Tonanai ki, wape inontarai na Sardisi wai manea etanansiau weduarai, ampafe ene tarai toyari ewaitawang wedua ene ansung etatarai fo ambori werarika kaha, amani ewaitawang wedua ene taraifoi weru sasarifo. Inontarai nanisa mani emai, ambori eweriria yau tuti rahida fui wanai esansung ansung bua fo ki. ⁵Mandoni dino doara mutu dirapa Saminseni pariao wereafow mani, ambori isansuni na ansung bua fo toyarisa, tuti wirow ifating wonongfo weru Buku soi kariri inontarai esobu Waidani fosa nai foi kaha. Tuti na Dai Allai tuti ne wewaifosa earomireafow iroa wei we i mani nehu inontarai dine.

⁶Mandoni dino wetarang mani tarao kaiwo Allai Nuaninufi medurai we jemati kiai nina.”

Kaiwo arerai we jemati na Filadelfia

⁷Yesusi medu aha deyo, “Woi we wewai na jemati Filadelfia foi tonina:

Mano mirarebana foi tuti wetarai foi, andino yu Dauti ne aisu mananu foi ne, amani ne mambiriu fuba toyari Mananu Dauti na fafongfa. Fiai rahutu bei mani, wirow manei ne mambiriufei we kifei ahang kaha, tuti kifei mani manei wirow fiai ahang kaha. Amani, rahutufoi tifi weo tara nai to rang waworu feai we yiwangno Hukumi Musai soi foi. Yahudio etohong kariri Hukum nanisa kontaio wirow ewemambiriu we ehobu rang waworu nani ahang kaha. I mani, ne kaiwo medura finina. ⁸Iwaitawang fianai aino menari wa ampa. Iwaitawanai weo mefau kaha. Wape metohong kariri nehu Kaiwone tuti mefafora yau kaha. Ampafe mewati! Ifai rahutu bei tifi we mea ampa, tuti rahutu nani manei wirow wemambiriu we kifei ahang kaha. Rahutu nani mani ifariri

mea na meroaso yau terai fo, wiro na metohong kariri Hukumi Musai soi foi kaha. ⁹Inontarai siai mano enemitawang te erurai we etohong kariri Hukumi Musai soi foi we feririsa fosa mani, eteyo ea mani inontarai Yahudi tarai saine tuti eteiaya yau Yesusi. Wape inontarai nanisa epampamu terai, weo wiro eweYahudi na enemirorongfo kaha mae, Saminseni neo inontarai disa. Ea mani, ambori inarisa era mau etisangkapa eawemibukafo na mearomireawa ki, tuti ambori emadu eteyo, 'Tarai! Mano meroaso te Yesusi wa mea, Sempaisi enewawu mea paria!' ¹⁰Metohong kariri nehu Kaiwone na mai paria, amani metawang mea ampa na dadira rorong wa, ampafe yau kontai ambori yemang wedua mea na rahida nunei sentenang sodai dadira pari fe nai foi ki. Rahida nani mani kaiwasa na nunei kiai sobu fiweanggarisafo we etawai ki. Wape mea mani, yemang wedua mea.

¹¹Waroi ahang kahai mae ira mau rai, ampafe fianai aino mesobuaia fo, amani mene meroaso yau wa, merutawanaia mutu, ambori fiembaitaio Allai meinenamai we meara wa, wiro manei kia weru mea fanai. ¹²Mandoni dino doara mutu dirapa Saminseni pariao wereafo mani, wenani ambori minohia pepayai we fitawafa na Waidani. Ne tarai toyario dirio doaria pepayai tuti munu bei, tonanai kontai, yau ambori ikutuaifa we minohia mutu na Allai ne Munufoi na Waidani ki. Tuti ambori isoi Allai wonongfo nai, tuti Allai ne bendari wonongfo nai kontai, amani Yerusalemi weworu foi, bendario ambori bia nano Allai na rorafaisi meu foi. Tuti isoi wonohu weworu ne na ne taraifo kontai ki.

¹³Mandoni dino wetarang mani tarao kaiwo Allai Nuaninufi medurai we jemati kiai nina."

Kaiwo arerai we jemati na Laodikia

¹⁴Yesusi medu aha deyo, "Woi weo wewai na jemati Laodikia foi tonina:

Mano wonongno *Antu* foi, i mani mano deiriri kaiwofo na mai tuti na wetarai dine. Tuti fi fubao Allai niariri na nunei kiai ne mani weneung nai. I mani ne kaiwo arerai we jematiwai finina. ¹⁵Iwaitawang kariri fianai aino menari wa ampa. Amani mene meroasoawa wiro maninggapoi ete danunanang kaha, toyari meraria yau pari kaha, tuti metawing mene meroaso yau wa pari kahai kontai. Ne tonanane karira paria! Denteng mani, merurai paria we meraria yau na mai, ete bireri mani metawing yau beyari finanaia. ¹⁶Wape wiro menari tonana kaha, mae mene meroasoawa kifakifayai, amani menemiwawera na mene meroasoawa, ete meroaso yau kuteai terai, ampafe ikasou mea pariao ambori ikandi mea to boriai weru borohunei ki. ¹⁷Memadu meteyo, 'Inontarai amene fi di amea, amesobu ra bitoyara, wiro amene pari wefiea kaha.' Memadu tonanai wape mewartawana kahai weo na mene

meroasoawa mani, mene obu fiea kahaifa ne ne? Mekaharia mebung kahai, meuremiwa fafa, tuti menayai arora. ¹⁸Ampafe yeunau mea mau we todoni mani meworio fi mai fo ria yau, amani emasio mai sewa fo we mene ra, ambori na Sempaiai arongreafo mani mene ra bitoya, tuti mewori ansung bua fo we mesansung nai ambori menayai arora tuti mamamaya ahang kaha. Kontai rawangno ufi tauremine naya fo ambori metufi meuremiwa naya mani mewati aha.

¹⁹Mandoni dino enehuwawuti fo mani, niari sarawa mani isuari tuti yohong aiboifo wei we yeunauwi nai. Ampafe isua mea, yohong aiboifo we mea tonina ne mani, merurai paria tuti metarabera mea weru mene sasariwai ambori mene meroaso yau wa wiro kifakifayai ahang fanai. ²⁰Mewati! Ira mau yoa na mene rahutu borong wa mae yutanai. Mandoni dino taraoai tuti fiafai rahutufi we yau mani, ambori ira wei afui tuti iminohi yampi riati tuti dampi ria yau kontai.

²¹Mandoni dino doaria mutu dirapa Saminseni pariao wereafo mani, ambori iroa wei we minohi ria yau na nehu kadera mananu nei. Kariri yau we yoara mutu yirapa Saminseni fo, ampafe iminohi ria Dai Allai na ne kadera mananu fe nina.

²²Mandoni dino wetarang mani, tarao kaiwo Yesusi Nuaninufi medurai we jemati kiai nina.”

Yohanesi deti fi kariri Allai ne mananufu

4 ¹Mayeai iwati fieai aha, amani iwati rahutu bei na rorafaisi tifai. Ainanaya tarahuo mano anta medu we yau na rawafui fiebai toyario songgerifo, medu we yau nariai aha deyo “Bautai toninai meai, we yeinawi kariri fianai aino ambori kawariai aha fo we wau.” ²Na tatofang nanai kontao, Allai Nuaninufi sensoni yau. Ainanaya iwati kadera mananu bei na Waidani tuti manei minohi nai. ³Wenani keiwewa toyari kamieio keiwewa ne harga dedai, amani kamieio memarampoti esahui we intan, tuti kamieio berika esahui we sardisi fenanai. Tuti aewi bei doa woruwi na katai minohi nai foi. Aewi nani ne tarai kariri kamieio ne harga dedai bei, amani kamieio keiwewa, esahui we zamrud. ⁴Na katai nani kontai iwati kadera mananu fo piareia boa tuang wariri, tuti mano eminohi naya fosa mani, mano ewewafoniai ewepiareia mana fosa. Ansung etatara fo bua karofari tuti etata sapewi mananu fo na enumifo, sapewi nanai enari na emasi kiai. ⁵Tuti na kadera mananu foi nani iwati kaiwewa kewariai nai tuti kadidu dotu tuti nubuyai nai. Mae na arongfo, oborio itu doa danggararu nayai. Obori nanai deinawi karirio Allai Nuaninu itu fo. ⁶Tuti iwati rawanang bei mani, ne tarai toyario kasinai wiatai na arongreafo, memarampoti paria.

Mae iwati fidarang mana etoari na katai kadera mananu foi warabuka boa fo. Euremifo bitoya paria, amani bitoya na earomifo tuti bitoya na

ehurumifo. ⁷Fidarang mano reantenang foi ne tarai toyario singa, mano mandu foi ne tarai toyario sapi mang manei, mano mantoru foi mani ureng toyario inontarai, tuti mano mana foi ne tarai toyario koroweio yera warapemafoi we sifo. ⁸Tuti ewaramipemafo aiwonang, na ene taraifo sentenang weureng, tuti na ewaramipema arowawahi fo kontai weureng. Diru rahida erohi pampang efiai Allai. Erohi eteyo,

“Seng Allai wau, murarebanai, murarebanai, murarebanai,
Mano Wemananu Dedai Mantaung di wau,
Mano nayai kawuru na reantenang pari foa foi di wau,
Mano nayai pariao sobu rahida bonini,
tuti Mano nayai pampang we fitawafa di wau.”

⁹Mano fidarang mana nanisa erohi rarungfoi we efiai Allai mano minohi na ne kadera mananu foi nani, amani mano minohi wenumainufo. Etaparandini, esomi wei, tuti etohong mahikai wei. Erohi efiai tonanafo, ¹⁰mano ewewafoniai fosa, amani mano ewepiareia mana fosa, etawai aweu etisangkapa eawemibukafo na Mano Darang Wefitawafa foi arongreafo, esomi wei tuti efating ene sapewi mananu fo etohonai watai na arongreafo tuti emadu eteyo,

¹¹ “Dai Allai amene Sengne wau,
Meiri wauno mosi we amefiai waune.
Meiri wauno weMananunei.
Wauno ametaparanding wau,
Amesomi we wau tuti ametohong mahikai we waune.
Weo wauno nari fi fuba nini kiai ne.
Tuti nariri kariri nemu bawia wa ne.”

Buku reraungno kafaria mitu foi tuti Domba Antung foi

5 ¹Mayeai iwati mano minohi na ne kadera mananu foi yuo buku reraungno kafaria bei na warang domoya foi. Buku reraungfoi dowani donini sefang na kaiwoariri, tuti taha weduaria mitu na segel kesi itu (7). ²Ainanaya iwati wewai wemambiriu manei medu na rawafui fiabai deyo, “Mandoni dino mesi we fioabuo segel kesi itu fo tuti fiorera buku reraungfoi ne?” ³Wape na rorafaisi ete na nunei, ete na kofa rorong wau kontao, manei wiwo mesi we fia kaha tuti deto kaiwo nayai na rorongfoi kaha. ⁴Tarahuo kaiwofo nanai isaia yeidu, weo wiwo obu manei mesi we fiorera bukufoi tuti deti rorongfoi kaha fefe. ⁵Ainanaya manei na mano ewewafoniai fosa medu we yau deyo, “Wai fanai! Boti! Inontarai manei, wonong fino *Singa Na Yehudai*, ahui we *Riria Na Dauti* kontai, andino kiraikobu Saminseni. Meiri andino mesi we fiosabu segel kesi itufo tuti fiorera buku reraungfoi ne.”

⁶Mayeai iwati Domba Antung manei doa rahanai na kadera mananu foi, tuti fidarang mana fosa, tuti mano ewewafoniai fosa. Domba Antung

foi iwatioi na ne taraifo pesai fari bitoya toyari emuni kawurua fenana. Nungkaradoi itu tuti ureng itu kontai. Nungkaradoi itu fo deinawi ne mambiriu fuba fo, tuti ureng itu fo deinawi Allai Nuaninu ituo denatuai we nunei sentenang ne. ⁷Ainanaya Domba Antung foi saha afong yuo buku reraung kafaria mitu foi ria mano minohi na kadera mananu foi warang domoya foi. ⁸Na kutu warawa yuo buku reraungfoi nana fo, fidarang mana fosa tuti mano ewewafoniai piareia mana fosa etawai aweu etisangkapa eawemibukafo na arongreafo. Eru kecapifo tuti rewangguai nofio enari na emasi fo, rewangguai nofi nanai esoni finunsai mamporio deinawi Allai ne inontarai emararebana fosa ene nadifo.

⁹Tuti erohi rarung weworu rowei dotu tono:

“Wau mosi we ka buku reraung kafaria mitu nani ne,
tuti fosabu segeli taha weduari nai foi ne.

Weo emung waua mureha ampa,
tuti na nemu rika tiwowu nani,
bai kutu inontarai fuba nunei kiai,
we Allai ampa,
amani inontarai na riria bodoni kontai,
na kaiwo bodoni kontai,
tuti na nu bodoni kontai.

¹⁰Ruai inontarai nanisa kiai we nemu inontarai
we eminoi na nemu Mananuwa,
tuti ambori we eweimami,
we erufi we tane Seng Allai,
tuti eru nunei ki.”

¹¹Mayeai iwati tuti itarahuo wewai katui ahang kaha, bitoya paria ne fiafu tarahio 1.000 we1.000, tuti 10.000 we10.000, wiro ato afonso ne fiafu kaha, etoa wari kadera mananu foi, tuti fidarang mana fosa, tuti mano ewewafoniai fosa. ¹²Erohi na erawamifui fiabai eteyo,

“Domba Antungno emung waua wa wau mosi,
Mosi we Allai yu wau we weMananu,
Mosi we wobu ra we nemu,
Mosi we wobu Allai ne awaifo,
Mosi we Allai dohong wau wemambiriu,
Mosi we amesomi we wau,
Mosi we ametaparanding wau,
Tuti mosi we amefiai wau.”

¹³Ainanaya tarahuo inontarai fuba nini kiai, tuti andowa fuba nunei kiai, amani mano na rorafaisisa, na nuneisa, tuti na kofa rorong wausa, erohi efiai eteyo,

“Mano munohi na nemu kadera mananu wai,
tuti Domba Antung wa wau,

Muruino amefiai muru,
 Muruino amesomi we muru,
 Muruino ametaparanding muru,
 tuti muruino muwemananu we fitawafa ne.”

¹⁴Fidarang mana fosa eroatuba ene rarungfoi eteyo, “Antu!” Tuti mano ewewafoniai fosa etisangkapa eawemibukafo esomi we suru.

**Domba Antung foi fiosabuo segeli wonang
 fafong fo tuti fio kawariai naya fo**

6 ¹Mayeai iwati Domba Antung foi fiosabuo segeli itu fo bo reantenang foi. Ainanaya iwati fidarang mana fosa, tuti manei nasa sahu na rawafui fiabai toyari kadidu fenandai deyo, “Ro ma!”
²Ampafe iwatia mani, iwati kuda biua manei kiawariai ma, tuti inontarai manei dautai nai. Inontaraifoi mani yuo afai aburuei na warangfo, tuti manei dohong sapewi mananu bei wei. Inontarai nani da weinontarai wemambiriua we miung woru ne aitetafosa kiai.

³Mayeai iwatio Domba Antung foi fiosabu segeli bo boru foi aha tuti tarahuo fidarang mana fosa, manei siai medu aha deyo, “Ro ma!”

⁴Ainanaya iwati kuda manei aha kiawariai aha ma. Kuda nani mani berika toyari abo. Mano dautai nai mani manei dohong sondu fiabai bei wei tuti dohong mambiriu wei we fiating ne maifo weru nunei, ampafe wedaya inontarai nunesa eminohi na mai ahang kaha mae emamuna tuti emung wawerasa.

⁵Mayeai Domba Antung foi fiosabu segeli bo botoru foi aha. Tuti tarahuo fidarang mana fosa, manei siai aha medu deyo, “Ro ma!” Ampafe iwati aha mani, iwati kuda niuemetang manei. Mano dautai nai foi yu fititua maraba nai bei na warangfo. ⁶Tarahuo rawafui bei medu rahanai na fidarang mana fosa, amani medu kariri aibo kahari foi, deyo, “Pa denteng literi bei mani ne harga dedai paria, mai kariri manei yufi mani ne fiebaitai rahida bei fo, tuti pa denteng turura kaha foi kontaio literi botoru mani ne hargafo tonanai kontai. Wape ai saituni bongfoi tuti angguri bongfoi mani meiri fanai.”

⁷Mayeai Domba Antung foi fiosabu segeli bo boa foi aha. Tuti tarahuo fidarang mana fosa mano sea foi medu deyo, “Ro ma!” ⁸Ainanaya iwati kuda manei aha wape ne tarai fidadiru toyari mirehara. Mano dautai nai foi wonong fino *Marareha*, tuti manei siai, wonong fino *Aitamu Marareha Rorong* fo, da riati na kurufuifo. Usobu mambiriu we urato kutu kaiwasa na nunei kiai we rabuang boa, tuti rabuang bei nasa mani (¹/₄), umunsa weruai. Kaiwasa nanisa umunsa na mamuna, na kahari tuti fimaninang fimung, tuti na andowa memuna foi.

⁹Mayeai aha mani Domba Antung foi fiosabu nario segeli bo ring foi aha. Ainanaya iwati inontarai emarareha fosa enumianinufo, enayai

na mesba arowawahifo, amani mesba ne tarai kariri mesbao fafongfa enunung korbani we Allai nai foi. Ea mani mano kaiwasa emunsa weo ewuwu Seng Allai ne Kaiwo kariri Yesusi fo, tuti emadu eteyo Yesusi ene Seng dine, pariao wedaya emunsa tonana. ¹⁰ Esahu na erawamifui fiabai eteyo, “Sengno weMananu, murarebanai tuti tarai ne waune, kidoni wori kutu kaiwo kariri inontarai nunei fosa tuti inontaraio raminde emung amea fosa, tuti bohong aiboifo wesa ki?” ¹¹ Ainanaya manei dohong ansung bua fo mai sa tuti medu wesa deyo, “Metawang mea metamang kuteai, pariao mene doroi tuti mene maniworiri fosa era ruhiai ma memai akawuru wo. Mene doroi tuti mene maniwowiri nanisa Allai dirisa we ambori kaiwasa emunsara emarareha toyari raminde meara fo.”

¹² Mayeai iwati Domba Antung foi fiosabu nari segeli bo wonang foi aha. Fiosabui tonana fo, mundiei fiabai bei fiorirouwai na mambiriu, tuti wofaisi niumetang toyari ke fenanai, embaifo kontai berikahofi toyari rika. ¹³ Awahafaisi kontai tiafating tuti tiraru to nunei aweu toyari deduka si kahutu aibong kendi fenanai. ¹⁴ Tuti rorafaisi kontai niai toyari riraung mintantunung wape wanangfo siparia niai. Tuti uai tuti nufu kontaio tawera weru katai doa naya fo.

¹⁵ Ainanaya mananu fuba nunei kiai, inontarai baba fosa, mano ewenunggamiei we afai mamuna fosa, mano ene fi fosa, mano ewemambiriu fosa, kontai womingfosa tuti inontarai siai wei fosa kiai, ewawua etadiwa na katai we winsaburungfo tuti manapahangfo na uai rei. ¹⁶ Mae esahu we uaifo tuti manapahangfo eteyo, “Tiru meu biritawang amea, bodiwa amea weru mano minohi na kadera mananu foi urengfo tuti weru Domba Antung foi ne kasoufo. ¹⁷ Weo rahida fuba Allai tuti Domba Antung foi urainawi une kasou fiabai fo we kaiwasa nunei foi andinini, tuti mandoni kontaio wemambiriu we sodai ne tonanafo kaha.”

Inontarai Israelio ewe-144.000 esobu Allai ne fiainawiaifo na ene taraifo

7 ¹ Mayeai iwati wewai mana, etoari na nunei rea boa ne, mae erutawang wanang urengfo kai ambori wiwo siaya fanai, na rawanangrausi, ete na reirei tuti na ai rorong fo fanai. ² Ainanaya iwati wewai siai manei kiawariai na do wanang murang foi ma. Yuo Allai mano darang wefitawafa foi ne capifo na warangfo, tuti sahu na rawafui fiabai we wewai manao esobu mambiriu we emei nunei na wanangfo nanisa. ³ Sahu wesa deyo, “Dohonao metawing wanangfo we mei rawanangrausi ete reireisi tuti ai rorong foi fanai, pariao amewecapi tane Seng Allai ne womingfosa erewomifo na ne capinei akawuru wo.”

⁴ Ainanaya tarahuoi we kaiwasa wecapisa nanisa mani ewe-144.000, amani inontaraio dirisa na inontarai Israeli rabuangno ewesuraya boru fosa ene ririafoi saine.

- ⁵Na riria Israelifoi rabuang bei mani ewecapio ewe-12.000, amani:
 Na Yehudai ne ririafoi ewe-12.000
 Rubeni ne ririafoi ewe-12.000
 Gati ne ririafoi ewe-12.000
⁶Aseri ne ririafoi ewe-12.000
 Naftali ne ririafoi ewe-12.000
 Menaseri ne ririafoi ewe-12.000
⁷Simeoni ne ririafoi ewe-12.000
 Lewi ne ririafoi ewe-12.000
 Isakhari ne ririafoi ewe-12.000
⁸Sebuluni ne ririafoi ewe-12.000
 Yusupi ne ririafoi ewe-12.000
 tuti Benyamini ne ririafoi kontai ewe-12.000.

**Kaiwasa bitoyao ato afonsoi kaha foi etoari na
 Allai tuti Domba Antung foi uaromireafo**

⁹Mayeai iwati aha mani iwati kaiwasa katui ahang kaha, ato afonsoi kaha. Kaiwasa nanaisa mani inontarai fuba nunei kiai saine, amani inontarai na riria bodoni kontai, na kaiwo bodoni kontai, tuti na nu bodoni kontai. Esansunsa na ansung bua, etoari na kadera mananu foi refongfo tuti na Domba Antung foi arongreafo, tuti eru ai baya na ewaramifo. ¹⁰Na erawamifui fiabai etaparanding Allai eteyo,

“Amefiai wau,
 amene Seng Allai,
 mano munohi na nemu kadera mananu wai!
 Tuti amefiai Domba Antung wa wau!
 Weo mumeiri muruino mufariri inontaraine amea ne!”

¹¹Wewaifoi kiai etoa wari kadera mananu foi, tuti fidarang mana fosa, tuti mano ewewafoniai ewepiareia mana fosa, etawai aweu etisangkapa eawemibukafo na kadera mananu refongfo tuti esomi we Allai eteyo,

¹²“Antu!
 Allai, amene Sengne wau,
 meiri wauno amefiai waune
 tuti ametaparanding waune.
 Wauno wowai ne,
 ametohong mahikai we wau,
 tuti amesomi we wau.
 Wauno weMananune tuti wemambiriu we fitawafa ne.
 Antu!”

¹³Ainanaya mano ewewafoniai fosa manei dutang yau deyo, “Mano esansung ansung bua fo wanisa mani, mandoni saine, tuti era na doni ma?” ¹⁴Ampafe iroa wei yeyo, “Daie! Iserawerahai, wau boitawana

ne.” Ainanaya medu we yau aha ma deyo, “Kaiwasa fuba nanisa mani inontaraio esodai karirafu paria na dadira fiabai rorong nanai kiai na nuwauai tuti era na dadira rorong nanai ma. Ea mani eruai ene ansungfo na Domba Antung foi ne rikafoi tuti enaria bua karofaria fo saine.

¹⁵Nanai aino wedaya Allai yoa wesa we etoari na arongreafe nina, tuti diru rahida ewewoming wei na ne Munu rorong fo. Tuti Allai, mano minohi na kadera mananu foi, ambori demang weduasa ki. ¹⁶Wiro enumiruinso ewawisi na weai ahang kaha, tuti earomitataha na weai ahang kaha, wiro enumiruinso wofoi piyasara esasora ahang kaha. ¹⁷Weo Domba Antungno doa rahanai na kadera mananu foi, andino ne tarai we mantahung we dehunsa ne. I ambori kiasa we etunung mereha urengno dohong kaiwasa eminoi etarang we fitawafa foi ki, tuti Allai ambori dufi eumikurufo ki.”

Segeli bo itu foi, Domba Antung foi fiasabui

8 ¹Mayeai Domba Antung foi fiasabu segeli bo itu foi nanai, rorafaisi wewui beyari paria araha ureng aburung fea.

²Ainanaya iwati wewai ituo etoari na Allai arongreafu, tuti manei dohongno songgeri itu wesa.

³Mayeai iwatio wewai siai manei kiao nofi nunung finunsai mampori naio nariri na emasi foi, da wa doari na mesba arongfo. Tuti manei dohong finunsai mampori bitoya weia we niunung ria inontarai eroaso fosa ene nadifo na mesbafoi, na kadera mananu foi refongfo.

⁴Ampafe riraungno finiunsai mamporio wewaifo niunumi foi, dautai ria mano eroaso Yesusi fosa ene nadifo we Allai ayai, na nocio niunung finiunsai mamporio yuti na warangfoi. ⁵Mayeai wewaifo da wa kia adiafo na mesbafoi ma, soniai to nofi niunung finunsai mamporio yuti na warangfoi, tuti kifa kangguni to nuwauai aweu. Ampafe kadidufi sarabau kahofa wau tuti kaiwewaifo keiwewari bitoya paria, tuti mundiei fiabaitureha bei fiorirouwai na mambiriu.

Wewaifosa ebui songgeri wonang foi fafong

⁶Finanaia kaifo, wewai itufu emainenang we ebui songgeri ituo eru fo.

⁷Ainanaya wewai mano reantenang foi biuio songgeri bo reantenang foi, mayeai na tantuma metang kamiei foi miung, metang nani miung-tuti adiafoi tuti rikafoi to nuwauai aweu, wedaya nuo ato kutuwi we betoru foi, adia kaso weai (1/3). Tonanai kontai we ai tifu foi, amani kutuwi we betoru foi adia kaso do weai tonanai kontai, tuti ninoi kehe foi, adia kasoi kiai.

⁸Mayeai wewai mano mandu foi biui nari songgeri bo boru foi aha, ainanaya iwati manei so fi ne tarai toyari uai fiabai denggararu toyari adia bei to rawanangfoi aweu. Wedaya rawanangfoi ato kutuwi we betoru

foi kontai dowe (1/3) werikara sentenang. ⁹Tuti fi niai nai foi kontai ato kutuwi we betoru foi, dowe (1/3) mirehara kiai; tonanai kontai we kaparifoi kiai, ato kutuwi we betoru kontai, dowe (1/3) deisui ete kerira kiai.

¹⁰Mayeai wewai mano mantoru foi biui ne songgeri yuti foi aha, ainanaya awaha fuba bei denggararu toyari antironi fenanai, sawai na rorafaisi to wayafo aweu, wedaya waya tuti mereha ureng fo na nunei ato kutuwai we betoru, dowe (1/3) pirandima kiai. ¹¹Awaha nani wonong fino *Pirandimai*. Ampafe dohong wayafo tuti mereha ureng fo doweai tonanai parandima wedaya inontarai bitoya emarareha weo etunung merehafo fefe.

¹²Mayeai wewai mano mana foi biui ne songgerifoi aha, ainanaya iwati fieai bioi kobu wofoi ampefe bauri we betoru mani dowe (1/3) kerirawao mamantiti. Tonanai we embaifoi tuti awahafo kontai. Finanai kiai wedaya rahidafo atori we betoru mani, dowe (1/3) mamantiti, tuti dirufo tonanai kontai, atori we betoru mani, dowe (1/3) awahafo tuti embaifoi wiwo danggararu kaha.

¹³Mayeai iwati aha mani, iwati romu korowei manei sifo kefang aweu kahai, mae sahu na rawafui fiabai deyo, “Karirao! Karira! Karira paria we inontarai nuwai mea, weo na rabuang bo wewai mantoru fui fo sitoru itobui itone songgeri botoru fo aha mani, mesodai karirafu paria na fi karira botoru fo ki.”

9 ¹Mayeai wewai mano ring foi biui ne songgerifoi aha, tuti iwati awaha bei sawai na rorafaisi to nuwaisi aweu. Manei dohongno aisufu we awahafoi, ambori fia Kamirei Berorong foi^e nai. ²Ainanaya fia Kamirei Berorong foi tuti riraungfoi kiawariai na kamirei rorong fo ayai. Riraungfoi mintantunung toyari kafafe niuemetang fenanai, awa tebung wedua wofoia sambewarai nariai ahang kaha tuti rorafaisi kontai memantiti beyari. ³Tuti mansonggeri katui ahang kahai kiawawariai na riraung rorong foi aweu sinsung nunei. Mansonggeri nanisa esobu mambiriu we etisang mani damirai toyari amafiahi. ⁴Mano demisa foi, deretawansa weo wiwo emei aifo, ninoifo ete fitantanang siai wei foi fanai. Mae etisang te inontaraio wiwo esobu Allai ne capifo na erewomifo kaha fosa terai. ⁵Wape wiwo esobu mambiriu we ewedayasa emarareha kahai, mae ene memufu wedayasa etamirai beng kaha paria embai ring. Ene memuo wedayasa etamirafu ne tarai toyario amafiahi we disang manei mani damira fenanai. ⁶Na rabuang bonani kaiwasa nanisa enemirorong dohong paria we emarareha terai, wape mararehafoi toyari niyai waroi werusa.

^e 9:1 Amani kamireio etamu Saminseni tuti neo raifosa nai, pariao esobu aibo na rahida Sengnei kiutu kaiwo nai foi.

⁷Mansonggerifosa ene tarai toyario kudao meinenang we memuna. Na enumifo etata fi ne tarai toyari sapewi mananu, nariri na emasi, mae euremi toyari inontarai. ⁸Enumirandaungfo dawariroi toyari wiwing enumirandaung, tuti ederemi toyari singa dereng. ⁹Earomifo tabung weduarai na fi ne tarai toyario ansung besi. Tuti esifo mani ewaramipemafo nubuyai toyari kuda bitoya paria emitu rifu oto mamuna fo to mamuna rorong ne nubuyafo nanai. ¹⁰Eamamindaung kariri amafiahi tuti weababo tonanai. Ene mambiriufu nayai na eamamindaung nanai, we etisang inontaraifosa nayai, tuti wedayasa etamirai paria we embai ring. ¹¹Ene mananuo wenunggamiei wesa foi mani, wewaio wenunggamiei we Kamirei Berorong foi dine. Wonongfo na kaiwo Iberani mani esahui we Abadoni, mae na kaiwo Yunani mani esahui we Apolioni. (Nana mani *Mano Niari Fi Karira*.)

¹²Fi kia karira fo ne reantenangfe tawera ampa. Wape beruo ambori da aha ma ki.

¹³Mayeai wewai mano wonang foi biui ne songgeri yuti foi aha. Ainanaya tarahuo rawafui bei kiawariai na mesba emasio wiatai na Allai arongreafoi, nungkaradoi boa fo. ¹⁴Rawafuifo medu we wewai mano wonang foi deyo, “Bisuo wewai manao eworasa etoari na waya fiabai Efrati foi.” ¹⁵Ampafe da wa disuo wewai mana fo sara, weo waroi ampa etamang we ne diru neungfo mai, amani emainenansa terai we ene defuinafo, embaifo, rahida tuti araha ureng mai we era. Tuti era weo emungno inontarai na nuneisa, ato kutusa we betorua mani, emung rabuang bei (1/3). ¹⁶Tarahuo rawafui bei deikaririai we yau deyo, afai mamunao etautai na kudafo era ria wewai mana fosa nanisa mani ewe-200 juta.

¹⁷Tuti na fiainawiai iwatioa fo mani, iwati afai mamuna fosa tuti kudao etautai nai fo nanisa mani, afaifosa esansung ansungno besia ehai. Ansung besi etatara fo mani arongfo barikahofi toyari adia, kahe rawanderi, tuti bamining toyari kamiei belerang. Mae kudafosa mani, enumikamieifo toyari singa. Adia, riraung, tuti belerang kawariai na eboromifo ariei. ¹⁸Fi betoru kawariai na kuda eboromifo ariei nanai ne tarai we fimung, wedaya inontarainesia kiai, ato kutusa webetorua mani, rabuang bei (1/3) na sa mirarehara kiai. ¹⁹Kudafosa ene mambiriufu wedaya inontarai emarareha nai nanai, nayai na eboromifo tuti na eamamindaungfo. Weo eamamindaungfo wenungkamiei toyari tawai nungkamei, tuti na eamamindaung nanai enari kanggani tuti emung inontarai nai.

²⁰Wape kaiwasa bitoya foi, amani ne seao emarareha na fimung nani kaha fosa, wiwo ematai we etaraberasa weru ene sasari enariri foi kaha. Wiwo efotou esomi we arowuifo kahai, aririwangno enariri na emasi, peraki, tembaga, kamiei tuti ai foi kaha. Fi esomi weai tonana fo wiwo weureng we

deti kahai, wetarang we tarao kaiwo kahai, tuti weaweng we da kahai. ²¹Ea kontai wiro etawing fi kerira enariri foi kaha, toyari emung inontarai fo, eha rawang fo, emaninawa funoma fo, tuti ehamananapifo kaha.

Wewai tuti buku reraungno ketui foi

10 ¹Mayeai iwati wewai siai manei aha. Wewai nani wemambiriu paria, biari na rorafaisi meu. Ne tarai kariri sensuni na kafe bei, tuti aewi bei doa na nungfoi. Urengfo sambewarai toyari wo sambewarai mae awengfo ne tarai toyari aisiyang fiabai denggararu fenanai. ²Na warangfo yu buku ketuio rerawi kawurua bei. Biari meu, aweng bo domoya foi doa sau rawanangrausi mae aweng dowe foi doa sau reitahafoi. ³Sahu na rawafui fiabai paria, ne fiabaifo toyari singa manei bibe, tuti kadidu itu dotu tuba rawafuifo aha, toyari eroao ne kaiwofo. ⁴Kadidu itu fo dotu kai nanai yeo isoi kaiwo tarahuoi nanai, manamo tarahuo rawafui bei medu we yau na rorafaisi deyo, “Wiro woi kaiwo taramuoi na kadidu itu fo nana fanai, mae taramuoi terai tuti nemuboruoaifa ra.”

⁵Ainanaya wewai anta iwatioi nani, amani mano doa na rawanangrausi tuti na reitahafoi, yuai warang domoya foi to rorafaisi ayai we fefora. ⁶Tuti fefora na Allai wonongfo, manoarang wewitawafa foi, andino niari rorafaisi, nunei, rawanangrausi tuti fi kiai niyai nai foi. Fefora deyo, “Fianai aino Sengnei kiutuui we niari fo, finanai wiro fioukirai ahang kaha. ⁷Wape na rahidao wewai mano itu foi biui songgeri bo itu foi mani, fianai aino Allai kiutuui kawurua we niari fo, pariao ninai dediware nendai fo, dohong kaririai ki, kariri Kaiwo Mahikai medurai we ne womingfesara fo, amani ne nabifosa.”

⁸Mayeai rawafui anta tarahuoi medu we yau na rorafaisi nani, medu aha deyo, “Roa, ka buku reraungno tirera kawurua foi ria wewaio doa sau rawanangrausi tuti reife nani na warangfo ma.”

⁹Ampefe ira we wewaifoia yutani we dohong buku reraungfoi we yau ma. Ampafe medu we yau deyo, “Karia tuti bani. Na boromuwa numuruainso memisi toyari aniwa ne maing, wape toni afui wori dohongno enemuwai memboni ki.” ¹⁰Ainanaya ika buku reraungfoi riati na warangfo ma tuti yani kariri deyofo. Yania mani, na borohune nuhuruainso memisi kariri aniwa ne maing, wape itoni afui mani wedaya enehufuisi memboni paria. ¹¹Ampafe manei medu we yau aha deyo, “Wuwuo Allai ne kaiwo dohonai we wau ne aha, kariri fio Allai deyo ambori niari nao nunei fo, amani fio niari we kaiwasa na riria bitoya, inontarai na kaiwo bitoya, inontarai na nu bitoya, tuti we mananu bitoya kontai.”

Kaiwo kariri Allai ne nabi mandu demi suru fosuru

11 ¹Mayeai manei dohongno ai rea titua fi nai bei we yau, tuti Allai medu deyo, “Ka fititua nai nani we roa titua nehu Munufoi na

Yeruselemi nai tuti mesbafoi. Tuti boto kariri kaiwasa esomi nai fosa maneuru. ²Wape munu refong boriei foi mani tituati fanai, weo katai nani mani yohoni terai we inontaraio etaroanso yau kaha fosa. Inontarai nanisa ambori eru bendari mirarebanai Yerusalemia embai piarua boru tuti emei kanggani ki. ³Tuti ambori yohong mambiriu we nehu inontarai mandu we umadu nehu kaiwo yohonai we suru ne rahida 1260 ki, ete embai piarua boru. Inontarai nani suru usansung ansung toyari ansung karungfo, amani ansungno fafongfa nabi Israeli fosa esansuna fo.”

⁴Allai ne inontarai nani ansuruino, ahu suru we ai saituni roworu fo tuti pelita aweng boruo^f uroa na Allai, mano weSeng we nunei sentenang, arongreafo suruine. ⁵Masino manea eteo enari karirafeai we suru mani, ambori adia kiawariai na uboromifo ariei we kaso mano enari kanggani suru nanisa ki. Ampefe une aiteta enari kanggani suru nanisa, adiafoi kasosa emarareha tonanai. ⁶Inontarai nani suru Allai dohong mambiriu we suru we ureiwedua metangfoi, ambori ming kahai paria rahida umadu kariri Allai ne kaiwofo werea naya fo. Usobu mambiriu kontai we unari merehafoia werika tuti unari kanggani nunei na fimungfoi kiai kontai. Une mambiriu we unari finanai na rahida bodoni kontai ureo unari tonanafo.

⁷Umadu kariri Allai ne kaiwofoa kaia mani, andowa memuna manei, amani andowa memuna sewa foi kiawariai na Kamirei Berorong foi meai, tuti na mamuna rorong fo dapa suru tuti ming surua umararehara. ⁸Tuti une taraifo wiatai funomai na rang fiabai foi na bendari fuba foi. Bendari fuba nani kataio raminde epahu Sengneia mireha sawai nai foi dine. Bendari nani mani wonong tatawa fino Sodomi tuti Mesiri, weo Sodomi tuti Mesiri kontaio unemirireu Sengfoi. ⁹Uwatai na nanai rahida botoru aburung feai mae, kaiwasa na nunei sentenang, amani inontarai na riria bodoni kontai, na kaiwo bodoni kontai, tuti na nu bodoni konta fosa, era ma we esai suru. Tuti eteiwedua mandoni kontai we wirow eha surua esarai suru fanai. ¹⁰Kaiwasa na nunei sentenang enemirireu suru ampefe efaraise we umararehafo, etohong muniara tuti etohong fi wawerahai wesa we etohonsua une mararehafo. Weo nabi nani suru unari kanggani inontarai nunesa paria fefe.

¹¹Wape rahida botoru aburung feai aha mani Allai dohong ansengfoi we suru aha, ampafe usuwi na marareha rorong foi aha ma tuti kaiwasafai ewati suru we uroari na earomireafa nanisa emataia etaperemi kiota eboromifo. ¹²Mayeai Allai ne nabio duwi suru nani suru, utarami rawafui bei sahu na mambiriu na rorafaisi meu deyo, “Murautai meai.” Ainanaya kafe bei sea ma soru surua, kia suru urautai to rorafaisi na une aitetafosa euremireafa.

^f 11:4 Zakariai 4:1-3, 11-14

¹³Na kutu nanai kontaio, mundiai fiabai turehi bei fio, wedaya bendari fuba foi, ato kutui wesura mani, ne katai besura nanai (1/10) mangganggung, tuti inontarai ewe-7.000 emarareha. Inontarai siai fosa, mano emarareha na mundiaifoi kaha fosa, ematai ebeng kaha wedaya etaparanding Allai na rorafaisi.

¹⁴Fi kia karirafu ne beru fe tawera ampa. Mae mewati ne betorufe anseung kahai mae kawariai aha ki.

Songgeri bo itu foi tuti rarungno mano ewewafoniai fosa erohi foi

¹⁵Mayeai wewai mano itu foi biui songgeri bo itu foi aha, ainanaya tarahuo rawafui bitoya na rorafaisi erohi na erawamifui fiabai eteyo, “Ninaia mani, nunei kiai, tuti nu bodoni kontai na nunei sentenang, nayai na tane Sengnei tuti ne Mananu Mampariri foi, uwarami rorong fo ampa. Tuti Sengnei ambori wemananu we yu nunei we fitawafa.”

¹⁶Tuti mano ewewafoniaio ewepiareia mana eminohi na kadera mananu piareia boa fo, na Allai arongrea fosa etawai aweu etisangkapa eawemibukafo, esomi we Allai.

¹⁷Efiai eteyo, “Seng Allaio weMananu Fuba Sewa wa wau, wauno nayai pampang ne tuti nayai kawuru na reantenang pari foa foi.

Ametohong mahikai we wau, we boinawi nemu mambiriu fuba wa ampa, tuti wemananu we ru nunei to.

¹⁸Kaiwasa etaroanso wau kaha fosa ehasoua etang wawerasa we wau, wape rahidafe mai ampa we boinawi nemu kasouwa tuti kutu kaiwo kariri mano emarareha fosa. Tuti rahida we bohong fiembaitafo we nemu womingfosa foi andinini, amani we nemu nabifosa tuti nemu inontarai emararebana fosa kiai, tuti mano etato wonomuwai fosa, katui ete fuba.

Tuti rahida we mungno mano emei kanggani nunei foi andinini.”

¹⁹Ainanaya Sempaiai ne Munufoi na rorafaisi tifai, tuti Buruao wiatai na munu rorong foi nani, wati pari, amani ne tarai kariri buruao fafongfa Allai ne Kaiwo Arerai dohonai we Musai fo watai nai foi dine. Kaiwewafoi keiwewari pampang, kadidufoi sara, mundiei fiorirouwai, tuti metang para kamiei foi miung.

Wiwingfoi tuti tawai naga foi

12 ¹Ainanaya iwati fitantuma fiabai bei na rorafaisi, fitantuma nani dohong yau ipapuhung wei paria. Amani iwati wiwing manei ne taraifoi sambewarai weo sensuni na wofoi. Awengfo doa sau embaifoi tuti sata sapewi mananu weawaha suraya boru fo na nunggamieifoi.

²Wiwing nani wearikang tuti bibe weo nuruainso amaina pirahai we minohi. ³Mayeai iwati fitantuma siai feai na rorafaisi aha. Amani iwati tawai naga fiabai sewa manei, ne tarai toyari tawai fiabaiturehi ete toyari wanggori fubateraha manei, berikahofi toyari abo, mae

nunggamiei itu, tuti nungkaradoi sura. Na nunggamiei itu fo sata sapewi mananu itu nai. ⁴Kifa amandaungfoi na rorafaisi, kifa fafating awaha bitoya tiafating to nunei meu. Neo fiafufo ato kutu awahafaisi kiai webetorua mani, fiaf kariri rabuang bei (1/3) na rabuang botoru nanai. Tuti doari na wiwingno rerai we minohi nani arongreafo, weo demang we arikangfoi saubaunung mani soni. ⁵Mayeai wiwingfoi minohi tuti arikangfoi, amani kaisung dine. Arikang nani andino ambori wemananu we nunei sentenang, ne mambiriu we yu nunei foi mani ne tarai toyari yuo aitatohi besi bei, amani ne mambiriufo fuba tuti yu nunei na tapapa. Nagafoi demang wei we soni tonanai, wape na tantuma wewai manei wewuri weru nagafoi, yuaisi to Allai tuti ne kadera mananu foa. ⁶Mae wiwingfoi wewu ne tarai to katai manano wekamamiei fo, amani kataio Allai meinenami wei foi. Na katai nani etawawuti rahida 1260, ete embai piarua boru.

⁷Tuti iwati mamuna fiabai na rorafaisi, amani Mikhaeli mano wenunggamiei we wewaifosa foi tuti ne wewaifosa emamuna we tawai naga foi tuti ne wewai erariati fosa, tuti emamuna wawerasa tonanai. ⁸Wape emamunara mani, nagafoi tuti ne wewaifosa ewemambiriu we etapa Mikhaeli tuti ne wewaifosa kaha. Ampafe ene pari katai na rorafaisi aha tuti etatasa weru rorafaisi. ⁹Ehafa kangkung tawai naga fiabai foi aweu, amani tawai tawa na fafong faini dine, ahui we Saminseni ete inggirane, mano wiwiaing kaiwasa na nunei we era sarawai tuti enari sasari fine. Ampefe Mikhaeli tuti ne wewaifosa ehafa kangguni tuti ne wewaifosa weru rorafaisi to nunei meu.

¹⁰Mayeai tarahuo manei sahu na rawafui fiabai na rorafaisi deyo, “Rahida Allai feriri ne inontaraifosa, tuti deinawi ne mambiriufo, tuti weMananufo, tuti rahidao Mananu Mampariri foi kontai deinawi ne mambiriufo we wemananu, ninaia mani kawariai ampa.

Weo mano dinggai tane doroifosa pampang, amani diru rahida dinggaisa na Allai urengreafoi, Mikhaeli tuti ne wewaifosa ehafa kangguni to nuwausi ampa. ¹¹Tane doroeroasoa fosa mani eharaikobu Saminseni ampa. Eharaikobui na Domba Antung foi ne rikafoi ne mambiriufoi, amani Yesus Kristusi ne rikafoi. Tuti eharaikobui na eteairai weo Domba Antung foi ene Seng dine. Esobu dadira pariao emarareha kontai ki, wape emainenang we esodai ne nanai tuti wiwo esu to fui weru ene Sengfoi kaha. ¹²Ampafe rorawa wau murarising to! Tuti we mano menayai nai wa mea memararising kontai to! Wape karira we mano menayai na nuwai mea tuti na rawanangwai mea. Weo Saminseni biari kawuru to nuwai meuwa tuti kesoua dang wawerahi. Weo deitawanai we wiwo sobu rahidafeai bitoya we niari ne karirafa ahang kaha.”

¹³Tawai naga foi detioai we ehafa kangguni to nunei meu fo nanai, dawi wiwing anta minohi tuti kaisung foi finanaya. ¹⁴Wape wewaifosa

etohongno romu korowei warapema fiabai boru we wiwingfoi, ampafe sifo weru nagafoi to katai emainenami weia foi, amani na katai minano wekamamiei foi. Tuti na wanai Allai ambori dewawuti paria defuina botoru aburung fea. ¹⁵Ainanaya nagafoi boroabi mereha fiabai foi na borongfo rufang wiwingfoia. Mereha nani ne tarai toyari waya we dedapa wiwingfoi weru katai niayai nai foi. ¹⁶Wape nunei fiata wiwingfoi ne tarai toyari fiati borongfoi we song mereha nagafi boroabiriri nani kiai to kofa. ¹⁷Tawai naga foi kesoua dang wawerahi paria we wiwingfoi kaha fefe. Ampafe da rufang wiwingfoi ne arikang siai fosa aha, amani inontaraio etohong kariri Allai ne Kaiwofoi tuti eteyo Yesusi mani ene Seng dine fosa. Da wa kiontai ne rai mamuna fosa weo emamuna wesa. ¹⁸Tuti da wa doari na nafarengfo, kesou paria.

Andowa kiawariai na rawanangfoi

13 ¹Ainanaya iwati andowa memuna manei, kiawariai na rawanangfoi meai. Andowa nani nungkamiei itu tuti nungkaradoi sura. Na nungkaradoi sura fo sata sapewi mananu sura nai. Mae na nungkamiei itu fo soi wang deibera Allai nai fo. ²Andowa nani ne tarai toyari macan tutul.[§] Awerengfo toyari beruang awereng, mae borongfo toyari singa borong. Andowa nini, tawai naga foi dohong mantauni ne mambiriufu tuti ne mananufoi wei we wemananu fuba. ³Iwati na nungkamiei itu fo bei kifari fiabai paria. Fari nani todoni kontai wedayari mireha rai, wape wiwo mireha kahai tuti farifo denteng ampa. Finanai wedaya inontarai nunesa kiai epapuhung weai paria tuti era riati. ⁴Kaiwasafu esomi we tawai naga foi weo mambiriu dohonai we andowafi fo, tuti esomi we andowafu kontai. Efiai eteyo, “Mandoni kontaio ne mambiriufu mai andowa nini kaha. Tuti mandoni wemambiriu we dapai rai?”

⁵Andowafu sobu mambiriu weo bioi arongfo deparanding berahi tuti deibabera Allai. Sobu mambiriu kontai we wemananu na nunei embai piarua boru. ⁶Fioai borong we deibera Allai tuti deikaherao wonongfo, katai dedai minohi nai foi, tuti inontarai fuba enayai na rorafaisi fosa. ⁷Sobu mambiriu we memuna we Allai ne inontarai emararebana fosa tuti kiraikobusa. Sobu mambiriu kontai we yu kaiwasa nunei kiai, amani inontarai na riria bodoni kontai, na kaiwo bodoni kontai, tuti na nu bodoni kontai. ⁸Andowa nani kaiwasa fuba nunei kiai esomi wei tantenang, amani kaiwasao wiwo ewonomifo watai na Domba Antung foi, mano emuni mirehara foi, ne Bukufoi kaha. Buku nani, na fafong pario Allai niari nunei kaharai mae, soi kawuru na Buku nani kariri inontarai esobu Waidani fosa foi.

§ 13:2 Macan tutul mani nehi fiabai memuna toyari harimau.

⁹Mandoni dino wetarang mani tarao kaiwo nina.

¹⁰Mandoni kontai, mano eroasoai tuti mano eroaso kaha fo, mandoni dino Allai kiutuai we eru aitamusoi mani, todoni kontai wenani ambori eru aitamusoi kaririai ki.

Tuti mandoni dino Allai kiutuai kawurua we mireha na fimamunafo mani, todoni kontai wenani ambori inontarai emuni kaririai ki. Ampefe inontarai emararebana fosa, todoni kontai etawansa na dadira esodairai ria andowafoi fo, tuti eroasoai mutu, wiro esu to fui fanai.

Andowa siai kiawariai na reitahafoi

¹¹Mayeai iwati andowa siai manei kiawariai na reitahafoi aha. Andowa nani nungkaradoi boru, une tarai toyari domba antung nungkaradoi, wape rawafufoi toyari tawai naga rawafufoi. ¹²Na andowa mano reantenang foi ne mambiriufu tuti na wonongfo, wedaya kaiwasa fuba nunei kiai esomi we andowa reantenang foi, mano ne kahafoi dentengna foi. ¹³Niari fitantuma fiabai tuti fiainawiai bitoya. Ampafe na kaiwasa bitoya foi earomireafu, niari adia bei biari na rorafaisi to nunei meu. ¹⁴Niari fitantuma tonanai na andowa reantenang foi wonongfo tuti na ne mambiriufu, ampefe na fitantuma nanai, weanggari kaiwasa fuba niyai na nufi nini kiai, tuti demisa enari aririwang manei ambori esomi we andowa reantenang foi nai, amani mano kifari na sondu bei, wape denteng ampa. ¹⁵Tuti sobu mambiriufu kontai we niari aririwangfoia darang, medu tuti yurai, ampafe miungno kaiwasa fuba eteiayari fosa. ¹⁶Andowa mano wefuia foi denggoa kaiwasafoi kiai we esobu fiainawiai na ewarami domoya foi ete na erewomifo, amani kaiwasa nunei kiai, katui tuti fuba, mano ene fi tuti mano bireri fosa, womingfosa tuti woming kaha fosa kontai, tuti mandoni kontai, we esobu fiainawiai na ewarami domoya foi ete na erewomifo. ¹⁷Ampafe mandoni dino wiro sobu fiainawiai nana na ne taraifo kaha, wiro dawayangfi ete wewori fi ahang kaha. Tuti fiainawiai nani mani, wonongno andowa reantenang foi, ete angka kariri wonongfo.

¹⁸Ampafe we waitawang kariri fi ninaifa mani, todoni kontai obu aunafo. Mandoni dino sewai mani, ambori deto kariri angkao deinawi kariri andowafoi nani, amani deto ruhi angkao ene nomorifo ambori sobu angka we wonongfo. Weo angka bonani mani kaiwo netaweai weo angka kariri inontarai. Ne angka mani 666.

Domba Antung foi tuti ne inontarai ewe-144.000 fosa

14 ¹Mayeai iwati aha mani, iwati Domba Antung foi doa na uai Sioni. Tuti iwati inontarai ewe-144.000 etoari riati kontai. Inontarai nanisa na erewomifo kiai soi Domba Antung foi tuti tamang Seng Allai uwonomifo nayai. ²Tuti tarahuo fi dotu fiabai paria na

rorafaisi, nubuyai toyari mereha sabi na dofiro tuti toyari kadidu fiabai nubuyai fenanai. Fi dotu tarahuoi nani ne tarai toyari kaiwasa emei na musikio esahui we kecapifoi. ³Ampafe iwati kaiwasa ewe-144.000 etoari na Allai arongreafo, fidarang mana fosa tuti mano ewewafoniai eminohi wari Seng Allai na ne kadera mananu fosa. Inontarai ewe-144.000 nanisa erohi rarung weworu bei, rarung nani manei siai wemambiriu we deitawani kaha. Kaiwasa ewe-144.000 nanisa mani Sengnei feririsa weru nunea fo saine. ⁴Ea mani, inontarai emararebanai toyari mano wirow etena ria wiwing kaha, mano wirow esomi we fieai siai kaha, tuti era ria Domba Antung foi to katai doni konta fosa. Inontarai nanisa Allai biai kutusa ampa na kaiwasa fuba nunei kiai. Ne tarai toyari inontarai etohongno fi reantenang esobuai na fi eru fo we Allai fo, ea kontai tonanai, amani mano reantenang ohonsa we Allai tuti Domba Antung foi saine. ⁵Inontarai nanisa ewaitawang epampamu na wea kaha tuti enari sara fi kutea kahai arorawa.

Wewai mantoru fositoru tuti kaiwo itomadura fo

⁶Mayeai iwati wewai siai manei aha, iwatioi we sifo na rorafaisi. Wewai nani meinenang we sahu tuti Allai ne Kaiwo Mahikaio, watai we numainu fo, amani ne Kaiwo Mahikai kariri Yesus Krisuti feriri kaiwasanei, sahu tutirai we kaiwasa fuba nunei kiai, amani we inontarai na riria bodoni kontai, na kaiwo bodoni kontai, tuti na nu bodoni kontai. ⁷Wewaifo medu na rawafui fiabai deyo, “Allai meiri andino memataiti tuti metaparandini ne. Weo rahidafe mai we kiutu kaiwo kariri nunei to. Mesomi wei, andino niari rorafaisi tuti nunei ne, rawanangrausi, tuti waya ureng fo.”

⁸Wewai mano reantenang foi medua kaia, mayeai iwati wewai mano sua ahang foi kiawariai aha ma tuti sahu deyo, “Misuhi to! Bendari fiabaio Babeli misuhi beyari ampa. Bendari nani dino raminde wedaya kaiwasa na katai doni kontai etunung ne angguri kerira foia emayeru emaninawa funomai. Amani wedayasa enari maino fikirirafoi kiai.”

⁹Mayeai wewai manei aha, amani mano mantoru foi, kiawariai aha, tuti sahu na rawafui fiabai deyo, “Mandoni kontai esomi we andowafoi tuti ne aririwangfoi tuti esobu fiainawiafo na erewomifo ete na ewaramifo fosa mani, ¹⁰inontarai nanisa ambori Allai kesousa paria tuti sousa ahang kahai mae yu aiboiosa na mambiriu paria. Ne kesou maraba fuba nanai ne tarai kariri sari angguri bitoya tono ne moki rorong foi pariao sefang paria, tuti etunumi kiai, nana mani esodai karira paria we Allai kesousa tonana fefe. Tuti ambori esodai dadirafu paria na Adiao webelerangno denggararu foi rorongfo ki, na wewai emararebana fosa earomireafu tuti na Domba Antung foi arongreafo. ¹¹Adiao wedaya esodai dadirafe nani, wirow fefe na wea kaha. Ampafe inontaraio esomi

we andowafoi ete ne aririwangfoi tuti esoi andowafoi wonongfo we fiainawiai na ene taraifo nanisa, ambori esodai dadirafo, diru rahida, pariao we fitawafa.” ¹²Ampefe inontarai emararebana fosa, amani mano etohong kariri Allai ne Kaiwofo, tuti mano eroasoia mutu, eraria Yesusi pampang, tuti wiro esu to fui kaha fosa, todoni kontai etawansa na dadira rorong esodaira fo ki.

¹³Ainanaya itarahuo rawafui bei na rorafaisi, medu deyo, “Toi finina: Na ninai to fongna mani, mano eroaso Sempaisi fosa, emarareha mani, Allai mioansa paria.” Tuti Allai Nuaninufoi yoa tubarai deyo, “Yo, tarai to! Ea ambori erufi aha ewaramitafa kaha, weo esobu fiembaitafo na fi eru na nunei fo ki.”

**Allai kiutu kaiwo we nunei, ne tarai kariri
mandohong romi deting ne aibong sanami fo**

¹⁴Ainanaya iwati aha mani, iwati kafafe biua bei na arohurea ne, tuti manei minohi nai. Wenani mani ne tarai kariri Kaisung Inontarai foi. Na nungkamiefoi mani satao sapewi mananu emasi bei nai, tuti yuo umbe sabiti reisa bei na warangfo. ¹⁵Ainanaya iwati wewai manei siai aha kiawariai na Sempaisi ne Munufoi ariei tuti sahu we mano minohi na kafafe wowong foi fo na rawafufoi fiabai deyo, “Ka nemu umbe sabiti wai we kutufi to, weo rahidafe mai ampa we kutu aibong na nuwausi ampa, we aibong na nuwausi miraia kiai ampa.” ¹⁶Ampefe mano minohi na kafafe wowong foi fiating ne umbe sabiti foi kifari we kiutu aibong nuwausi kiai, tuti na tonanane fianduhi aibongfoi kiai kiari to ne kataia wiatai nai.

¹⁷Ainanaya wewai manei siai aha da na Sempaisi ne Munufoi ariei. I kontai yu umbe sabiti reisa bei na warangfo. ¹⁸Tuti wewai manei siai aha da na mesbafoi, amani wewaio yutawang adia we keso fi na mesba wowong fo. I kontai sahu na rawafufoi fiabai we wewai mano anta yu umbe sabiti reisa foi fo deyo, “Ka nemu umbe sabiti wai tuti kutu aibong angguri weru arirawangfo kiai, weo aibong angguri na nunei kiai mirai ampa.” ¹⁹Ampefe wewaifo fiating ne umbe sabiti foi kifari to nunei sentenang aweu, fianduhi aibong angguri fo kiai nai, akawurua soi tono katai fiabaio etaha kangguni nai bei. Katai etaha kangguni aibong angguri nai nani mani, kaiwo yiwansoi weo Allai ne kasoufo tuti todoni kesou inontarai nunesa paria fo. ²⁰Aibong anggurine kiai etaha kangguni na katai etaha kangguni aibong angguri fo nai foi na bendari do boriai foi, tuti rika deda nai, ne tarai toyari waya dedari. Rika nanai deda tonanai toyari wayao waroio kilometeri 300 teai, tuti berorongfo mani adareti meteri boru.^h

^h 14:20 300 km. mani, na kaiwo Yunani mani soi ‘1.600 stadia’. Tuti berorongfo meteri boru mani, soi ‘dedai kariri dedaio wai borongfo na kuda manei’.

Wewai itu fo tuti aiboi beitu fo

15 ¹Mayeai iwati fitantuma fiabai bei na rorafaisi, fitantuma nani dohong yau ipapuhung wei paria. Amani iwati wewai ituo Allai demisa era ma we eboi nunei fosa na fimung itu fo. Na fimung itu nanai Allai ne kasou we inontarai na nunei fosa, kai finanaya. ²Tuti iwati fi ne tarai toyari rawanang kasinai bei, tuti adia denggararu nai. Na rawanang kasinai foi dereungfo, iwati inontarai manea etoari nai. Inontarai nanisa mani inontaraio etirapa andowafoi, ne aririwangfoi, tuti ne angkao yiwang kariri wonongfoa fo saine. Etoa mae eru musikio esahuai we kecapifo na ewaramifo, kecapi nanai kecapio Allai dohonai wesa fine. ³Etoa mae erohi rarung bei, amani rarungno raminde Allai ne womingno Musai yohi foi tuti Domba Antung foi yohi foi. Rarung nani dotu tonina:

“Seng Allai wau weMananu pari sewa ne,
fi nari wa fuba, wedaya kaiwasa epapuhung,
tuti ehiri ewaramifo.

Wau mani weMananu we fitawafa,
fiani kontai aino nari wa masi tuti wetarai.

⁴Sengne waune, mandoni dino mitai wau kaha
tuti deparanding wonomuwai kaha ne?

Weo meiri wauno murarebana ne.

Kaiwasa na nu bodoni kontaio era ma esomi we wau,

We mandoni kontai deitawanai we fi masio nariri wai kiai wetarai.”

⁵Mayeai iwati aha mani, iwati rorongno Sempaisi minohi nai na ne Munufoi na rorafaisi tifai. ⁶Ainanaya wewai ituo eha aiboi fimung beitu fosa etariai na Sempaisi ne Munufoi ariei. Ansung esansuna fo buao karofari toyari kaiwewa fenanai, tuti na ansung esansuna fo arongfo, esoru ireu aburung enari na emasi feai. ⁷Mayeai manei na fidarang mana fosa, dohongno rewanguai wenofi ituo enari na emasi fo we wewai itu fosa. Rewanguai wenofi nanai sefang na Allai, mano minohi na numainu foi, ne kasoufo. Aiboi nanai Allai dohonai we bioi nunei naya fine. ⁸Tuti Seng Allai ne mambiriu fiabai foi, tuti ne sambewarai dadaai fo, wedaya ne Munufoi sefang na riraung. Ampafe mandoni kontaio wiro wemambiriu we suai afui kaha, paria aiboi beitu wewai itu fosa etohona fo kai.

Allai ne aiboi beitu bioi nunei naya fo

16 ¹Ainanaya tarahuo manei medu na rawafui fiabai na Allai ne Munufoi we wewai itu fosa deyo, “Mera wa mesari Allai ne kasouo watai na rewanguai wenofi fo to nuwauai aweu. Amani na ne aiboi beitu fo.”

²Ainanaya wewai mano reantenang foi da wa wiowu Allai ne aiboi reantenangno meinenami na ne rewanguai wenofi yuti foi to nunei meu,

we bioi nuwausi nai. Ampafe aiboi wewaifo wiowui to reitahafoi nani wedaya mano esobu andowafoi ne capifo na ene taraifo tuti esomi we ne aririwangfoi sa, esobu fimung, amani esodai fafororang kerira paria na ene taraifo tuti fafororang nani kiurunsa paria.

³Mayeai aha mani wewai mano mandu foi da aha, tuti wiowu Allai ne aiboi bo boru foi meinenami na ne rewanguai wenofi foi to rawanangfoi aha weu. Ampafe aiboi nanai wedaya rawanangfoi werika toyari rumang fenanai. Tuti finanai wedaya fifuba niai nai foi mirehara kiai.

⁴Mayeai aha mani wewai mano mantoru foi, wiowu Allai ne aiboi bo botoruo meinenami na ne rewanguai wenofi foi nani to wayafo tuti waya ureng fo aweu, wedaya wayafo tuti waya ureng fo werika kiai. ⁵Ainanaya tarahuo wewai mano wenungkamiei we merehafo kiai foi medu deyo, "Allai wauno Murarebana ne, wauno nayaifa pampang paria sobu nina ne tuti nayai kawuru na reantenang pari foa foi di wau. Aiboi bohoni we nufi ninai masi paria. ⁶Weo kaiwasa esodai aiboife ninisa, raminde emung nemu inontarai emararebana fosa kawuru ampa tuti nemu nabifosa ampa ampefe ene rikafo deda paria. Ampafe ea kontaio esodai nemu aiboi tonana fo, amani etunung rika nani. Tuti aiboi tonana fo masi paria we esodairai." ⁷Ainanaya tarahuo rawafui bei na mesbafoi deyo, "Tarai! Seng Allai wauno weMananu pari sewa ne, aiboi bohongna wa wetarai tuti masi."

⁸Mayeai wewai mano mana foi, wiowu Allai ne aiboi bo boa na ne rewanguai wenofi foi nani to wofoi aha. Wedaya wofoi meningkapoi fuba paria, tuti niunungrarafu inontaraifosa toyari adia rerafusa.

⁹Ampefe wo meningkapoi nani, niunungrarafu ene taraifoia wekahai, wedaya eteibera mano dohong fi mung foi wonongfo, amani Allai. Esodai ne karirafu tonanai ki, wape wiro etaraberasa weru ene sasarifo kaha tuti etaparanding Allai kaha.

¹⁰Mayeai wewai mano ring foi wiowu Allai ne aiboio na ne rewanguai wenofi foi nanai to andowafoi ne kadera mananu foia. Wedaya katai wemananu wei foi memantiti sentenang. Ampafe na mamantiti rorong nani, wedaya fimung esodairi foi damisa awao ehiri etaperemifo. ¹¹Ampafe eteibera Allai na rorafaisi we fafororang dohonsa etamira foi tuti fimung siai wei fo. Esodai ne tonanafo, wape wiro emaya we etaraberasa weru sasari enariri foi kaha.

¹²Mayeai iwati wewai mano wonang foi aha, da wa wiowu Allai ne aiboi bo wonang na ne rewanguai wenofi foi nani to waya fubao Efrati aweu. Finanai wedaya wayafoi sirarang ambori meinenang we mananu na do wo dautai nai fosa era kutuai nai we emamuna. ¹³Ainanaya iwati nuaninu kerira mantoru, itone tarai toyari kidowa. Itohawariai na tawai naga foi, andowafoi tuti nabi tarai kaha foi itoboromifo ariei (nabi tarai kaha foi mani ahui kontai we andowa mano mandu foi dineⁱ). ¹⁴Finani sitoru mani, nuaninu kerira itonari

ⁱ 16:13 Botio robongno 13:11-17.

fitantuma bitoya sitoru ne. Nuaninu kerira nani sitoru, itora wa itofanduhi mananu fuba nunei kiai we emamuna na rahida fubao Allai, Mano Wemananu pari sewa foi, kiutu kaiwo kariri nuneifo.

¹⁵Sengnei medu deyo, “Metarami ma! Ira toyari inontarai kiamananapi mau rai. Mandoni dino denansiau weduarai tuti meinenang pampang we deitawang ne ansungfo, ambori wiro da arora kaha tuti mimaya kaha, wenanai imoani paria.”

¹⁶Ainanaya nuaninu kerira fo sitoru, itofanduhi mananufosa na kataio na kaiwo Iberani mani esahui we Hermagedonifo.

¹⁷Mayeai wewai mano itu foi, wiowu Allai ne aiboi meinenami na ne rewanguai wenofi foi nani to rorafaisi meu. Ainanaya tarahuo manei sahu na rawafui fiabai na kadera mananu foi na Sempaaisi ne Munufoi, deyo, “Allai ne aiboifo kai finanaia!” ¹⁸Mayeai kaiwewafoi keiwewari tuti kadidufi sarabaurai, tuti mundiai fiabaiturehi bei fio. Mundiai fiabai tonana nei wiro fio na wea kaharai, na reantenang Allai niari inontarainesa fo paria sobu rahida bonini. ¹⁹Mundiai nani wedaya bendari fuba foi tibau webetoru tuti kaiwasa na nuo etaroanso Allai kaha ene bendarifo kontai woru. Weo Allai deti we Bendari Fuba Babeli nania tuti yu aiboio ne inontaraifosa, amani dohonsa etunung angguri deinawi kariri ne kasou fenanai na ne mokifo. ²⁰Nufo daisuia kai tuti uaifo musuhi. ²¹Metang esi foi miung, metang nani ureng bei mani miraba kiro piarua sura teai. Metang ureng nani sawai meu miung kaiwasanesa. Ampafe inontarai esodai fi nanisa eteibera Allai paria, weo fimungno metang kamiei esodairi nanai, maraba paria fefe.

Wiwing wedaya kaiwasa enari sasari foi tuti ne andowa dautai nai foi

17 ¹Mayeai manei na wewai ituo eha Allai ne aiboifo we nunei meu fosa, da ma medu deyo, “Ro ma, ambori yeinawiai we wau kariri todoni Allai dohong aiboifo we wiwing diruo wewonong foi nani, mano minohi na bendari fuba ebauni kefang we waya bitoya foi fo. ²Wiwing nani wedaya mananu fuba nunei kiai, enari sasari maninawa fo riati tuti wedaya inontarai nunesara ene tarai toyari emayeru na ne angguri kerira foi, ampafe etitua we fi enari fo kahai, mae etawayang funongsa kontai.”

³Ainanaya Allai Nuaninufi sensoni yau tuti iwatioai we wewaifo kiai yau to katai sirahiai wekamamiei fo. Na nanai iwati wiwing manei, minohi sau andowa manei kurungfo. Andowa nani berikahofi toyari abo tuti na ne taraifoi sentenang soi kaiwo tuti wang bitoyao deibera Allai nai fo. Andowa nani nungkamiei itu tuti nungkaradoi sura. ⁴Wiwingfoi ansung sensuna fo kehe werawanderi tuti barika toyari abo. Mae mianai na emasi, kamamieio ne harga dedai, tuti fi ne

tarai toyari raorio esahui we mutiarafai.^j Mae na warangfo yu moki emasi bei, moki nani sefang na fi piro kerira niari fo tuti ne maninawa poro fo. ⁵Na rewongfoi soi wangfeai. Wang nani ne fiainawiafo wiro deisaha para kaha, wape dotu kariri ne fi karira niari fo. Wangfo dotu tonina:

BABELI FUBA!

NEUNG TANAMAI WE WIWING DIRU KIAI

TUTI WE FI KARIRA PIRO FOI KIAI!

⁶Tuti iwati wiwingfoi meyeru we dunung Allai ne inontarai emararebana fosa ene rikafoi, amani mano eteyo Yesusi mani ene Seng dine fosa.

Iwatiai mani ipapuhung paria. ⁷Ainanaya wewaifo medu we yau deyo, “Fiani popuhung wei ne? Fi botioai nanai, amani wiwingfoi tuti ne andowa dautai nai foi, mano nungkamiei itu tuti nungkaradoi sura foi, ne fiainawiafo ambori yeikaririai we wau ki. ⁸Andowa botioi nani, raminde nanai niyai kawuru na nunei, manamo mirehafo waroi ampa. Wape katu mani kiawarai na Kamirei Berorong foi meai, we sodai ne karirafoa wioru ki. Kaiwasa nuneisa ewatiai we da aha ma fo nanai epapuhung wei paria. Weo raminde nanai niyai kawuru na nunei, tuti mireha wape ambori kiawariai aha wedayasa epapuhung tonanai. Kaiwasa nanisa mani, inontarai reantenang pari Allai niari nunei kaharai mae wiro soi ewonomifo na ne Bukufoi kaha fo saine, amani Bukuo soi kariri mano esobu Waidani fosa foi.

⁹Ampafe fininaifa mani, manei sewai tuti sobu aunafo na mai fino deitawanaifa fe. Andowafoi nungkamiei itu fo mani deinawi wiwoi ituo wiwingfoi minohi naya fo ¹⁰tuti mananu ituo ewemananu fosa. Mananu itu nanai, ewering emarareha ampa, manei wemananufe nendai, tuti manei kontaio wiro kiawaria kaharai. Mano kiawaria kaharai nani da ma mani, wiro wemananu waroi kaha. ¹¹Tuti andowa mano raminde nanai niyai na nunei, wape mirehara foi tuti katu mani kiawariai aha ma foi, i mani mananu mano indeatoru dine. Tuti i mani kiontai mananu itu fosa. Tuti katu mani da we sodai ne karirafo na rawanang adia foi finina.

¹²Andowafoi nungkaradoi sura botioa fo mani, deinawi kariri mananu surao wiro eru wang mananu fo kaharai fosa. Wape ambori esobu mambiriu we eru wang mananu fo araha ureng boyari, ria andowafoi ki. ¹³Mananu sura ninisa kiai eweboyari we etohong ene mananufu tuti ene mambiriufo we andowafoi. ¹⁴Ambori emamuna we Domba Antung foi, wape wiro ewemambiriu we etapai kaha. Weo Domba Antung foi kiraikobusa, weo i mani Seng fuba dedai sewa seng nunei kiai dine tuti

^j 17:4 Mutiara—Kamamiei reifofa niai na firai kamitatarai doa na katai murutufu rorongfo. Mutiara mani ne harga dedai paria.

Mananu fuba dedai sewa mananu nunei kiai dine. Tuti ne inontaraifosa, mano sahusa, mano dirisara fosa, tuti mano wiro esu to fui werui kaha fosa, ea kontai emamuna riati.”

¹⁵Mayeai wewaifo deisaharai kontai we yau aha deyo, “Mereha fuba botioi kiai na katai wiwing diru foi minohi nai foi mani, deinawi kariri inontarai fuba nunei kiai, amani inontarai na riria bodoni kontai, ete na kaiwo bodoni kontai, tuti na nu bodoni konta saine. ¹⁶Andowafoi tuti nungkaradoi sura anta botioai nanai, ambori enemirireu wiwing diru wewonong foi. Ne fi minohi tutira fo kai etawarai weruri tuti efating ne fiawawafoa doa arora. Etang ne taraifo, tuti enunumi na adia. ¹⁷Mananu sura fosa enari tonanai, weo Allai dino wedayasa ambori enemirorong dohong we enari finana fo. Ampafe enari kariri fi dawi wea fo. Amani eweboyari, etohong ene mananufo we andowafoi ambori andowafoi wemambiriu we wemananu paria fianai aino Allai medura fo mai kaririai. ¹⁸Mae wiwing botioi nani mani, deinawi kariri Babeli, bendari fubao yu mananu siai nunei sentenang foi dine.”

Babeli misuhi

18 ¹Mayeai aha mani, iwati wewai siai manei biari na rorafaisi meu. Ne mambiriufu fuba tuti ne taraifo sambewarai toyari wofe nanai, we sambewa nunei. ²Sahu na rawafui fiabai deyo, “Misuhi to! Bendari fiabaio Babeli misuhi beyari ampa! Kaiwasa wiro eminohi nai ahang kaha, mae ninaia mani, inggirafosa tuti nuanuni eharira fosa enariri we ene katai ampa, tuti romu kerira werarika foi kiai enariri kontai we ene munu. ³Weo kaiwasa fuba nunei kiai enari maninawafo riati, ne tarai toyari etunung ne angguri deinawi kariri fikerira pari niariri foi. Mananu nunei kiai enari maninawafo riati, tuti mano ewaworifi etawayanai ahang fosa esobu ra bitoya paria na ne maninawafoi, weo etawayang fikarira bitoya we kaiwasa na Babeli, fio ne harga dedai fine.”

⁴Ainanaya tarahuo rawafui siai bei na rorafaisi medu deyo, “Nehu inontaraiwa meaine, mera weru bendariwai to boriai ambori wiro mehontai na sasari ne kaiwasafu etohoni nani fanai, tuti ambori wiro mesobu ne aiboi fimung fo konta fanai.

⁵Weo sasari enariri foi tibuka awiai sobu rorafaisi ampa, tuti Allai aroporo sasari kerira enariri tonana nei kaha.

⁶Ampefe, mano metohong aiboi we bendari Babeli wa mea, fi kerira kiai raminde Babeli niariri we inontaraifosa wai, menari wei tonanai fuba sewa aha. Raminde nanai niari fi kerira bitoya wedaya inontarai siai esodai ne karirafu. Ampefe ninaia mani, meriwang ne dadirao niari tonana fo we mantauni aha, tuti ne metohonai wei fo weberu aha.

⁷Fianai aino raminde sobuaia fo, amani minohi na ne mai pari fo tuti sobu fi bitoya paria, kariri finanai, ninaia mani, metohoni sodai dadirafu

tuti enerorong fituayai fuba tonanai kariri ne mai sobuaia nanai. Weo deparanding berahi pampang, deyo, 'Yau mani wiro wiwinao urehukuru dada na wea di yau kaha, mae wiwing iwemananu di yau.'

⁸Deparandini tonanai ampafe na rahida boyari kawuru sodai kipa fimung karira fo beyari, amani mararehafoi, enerorongfoi fituayai tuti kaharifo. Tuti ambori adia kasoi kiai, weo Allai mano dohong alibofo wei foi mani, Seng Allaio wemambiriu sewa dine.

⁹Mananu fuba nunei kiaio enari maninawafo riati tuti eparaise na fimaranding enari fenani, ewati riraungfoi we dautai nai ayai nanai, ambori esaia etaidu we bendarifo ki. ¹⁰Ematai ao etohong baba kahai, ampefe etoari na waroi mae emadu eteyo, 'Aro! Bendari fiabai Babeli sodai ne karirafo paria. Babeli bendari wemambiriu foi, na araha ureng boyari kawuru mae wioru.'

¹¹Mano etawayangfi na nunei sentenang nesa esai tuti enemirorongfoi fituayai wei, weo manei wiori fi etawayangna fo ahang kaha fefe. ¹²Weo Babeli wiori fianggeng bitoya paria nasa, toyari emasi, peraki, kamiaio weharga dedai fo tuti mutiarafo, kontai ireu mahikaio biua karofari fo, ireu werawanderi fo tuti berika toyari abofoi. Kontai fianggengno enariri na aio wiro obu funomi kaha foi, fianggeng enariri na gaja uboreng foi, na aio ne harga dedai foi, na tembaga, besi tuti na kamiei mehikai foi. ¹³Tuti ai memisi rerawa, finunsai mampori fo, muri, kemenyang, angguri, maning, tepung tuti patibu, sapi tuti domba, kuda tuti oto kuda yabiti fo, tuti womingno afai mamuna fosa etafusa fosa. Finanai kiai anta etawayanai wei, tuti etawayangno inontarai wei kontai.

¹⁴Mano etawayangfi nanaisa, emadu we wiwingfoi, amani Babeli, eteyo, 'Fianggeng fuba enemurorong dohong wei foi tuti fio puraiserai na rahida neungne, toyari bampi na mai tuti fio denteng miang nemu taraiwai nai fi, wiorua kiai ampa, tuti wobui na weai ahang kaha.'

¹⁵Inontaraio etawayangfi we bendarifoia esobu ra bitoya nai nanisa, ambori ematai ao etohong baba kahai, etoari na waroi mae esaia etaidu we bendarifo. ¹⁶Emadu eteyo, 'Aro! Bendari fiabai Babeli nini sodai ne karirafo paria. Ne tarai toyari wiwingno sensuni na ireu biua karofari foi, ireu ne harga dedaio werawanderi foi tuti ireuo berika toyari abofoi. Tuti miang ne taraifo na emasi, kamiai weharga dedai tuti mutiara. ¹⁷Wape araha ureng boyari kawuru mae ne fianggeng fuba nani wiorua kiaia!'

Inontarai mano ehai kapari fosa, inontarai etontai na kapari fosa, mano erufi na kapari fosa, tuti inontaraio eha fianggeng etontai na kaparifo we etawayanai fosa, etoari na waroi. ¹⁸Ewati riraungfoi dautai na bendarifo ayai nanai, etaidu wei eteyo, 'Bendari na doni kontaio wiro mesi bendari fiabai nini kaha.' ¹⁹Ampafe ehafung kangganangso enumifo we fiainawiaifa we enemirorongfoi fituayai we bendarifo tuti esaia etaidu wei eteyo, 'Aro! Bendari fiabai nini sodai karirafo paria. Bendari

nini wedaya kaiwasa fuba etontai na kapari fosa esobu ra bitoya ampa. Wape na araha ureng boyari kawuru mae ne fianggengfoi kiai nani wiorua kiai.’

²⁰Mano menayai na rorafaisi mea, memararising we fi sodaira fo! Tuti inontarai memararebana wa mea, rasuliwa mea, tuti nabaiwa mea, memararising kontai we fi sodairai nanai! Weo Allai dohong aibo wei, we biai karirao raminde nanai niari we meara fo.”

²¹Mayeai wewaio wemambiriu manei yuai kamiei fiabai turehi bei, soi to rawanangnei meu tuti medu deyo, “Bendari fiabai Babeli waune, toyarine wau kontai Allai ambori so kanggung wau na mambiriu tonanai kontai ki, ampafe wiroti ati wau ahang kaha. ²²Nemu inontarai emei kecapai fosa wiroti taramiosa we emei ahang kaha, mano erohi fosa, mano ebui suling fosa tuti ebui songgeri fosa, wiroti taramiosa we erohi, ebui suling tuti ebui songgerifo na wea ahang kaha. Wiroti obu inontarai deitawang yufi manei na nanai ahang kaha, tuti taramio kamiei fiabai riroya patibu nai foi wedotu ahang kaha. ²³Wiroti ati padamarangfei wedenggararu nai ahang kaha, tuti kaiwasa enari muniara mandirau nai ahang kaha kontai. Weo raminde nanai nemu inontarai etawayangfi wasa mani, inontaraio ewe-ewonomi paria na nunei saine. Tuti na nemu rawang kerira wai weanggari kaiwasa fuba nunei nai.

²⁴Weo Babeli wau mungno nabifesa ampa, tuti Allai ne inontarai emararebana fosa ampa. Wonong we mandoni kontai mireha tonana fo, wauno waramu rikaosa ne.”

Kaiwasa na rorafaisi erohi eparaise we Babelio wiorufo

19 ¹Mayeai aha mani, tarahuwai na rorafaisi kaiwasa bitoya erawamifufoi nubuyai paria, esahu eteyo,

“Haleluya! Tane Seng Allai, tafiai,
weo andino feriri tata ne,
andino tataparandini ne,
andino wemambiriu ne!

²Tafiai, weo kiutu kaiwo na mai tuti wetarai.

Kiutuaifa ampa we dohong aiboifo we wiwing diruo fuba foi,
mano na ne maninawafo wedaya kaiwasa nunei eharira kiai ampa.
Allai miuni tonanai we biai ne inontaraifosa ene rikao raminde
wiwing diru foi miunsara fo.”

³Tuti esahu aha eteyo,

“Haleluya!

Weo adia kaso wiwing diru foi nani ne riraungfoi sinu we fitawafa!”

⁴Mano ewewafoniaio ewepiareia mana fosa tuti fidarang mana fo,
etisangkapa eawemibukafo esomi we Allai mano minohi na ne kadera
mananu foi fo, tuti eteyo, “Antu! Haleluya!”

⁵ Ainanaya tarahuo rawafui bei medu na kadera mananu foi deyo,
 “Mefiai tane Seng Allai, mea kiai, mano mewewoming we Allai tuti mano
 mesomi wei ne mea, katui ete fuba!”

Domba Antung foi tuti ne muniara mandirau foi

⁶ Mayeai tarahuo fieai toyari kaiwasa bitoya paria esahu. Erawamifuifo
 fiabai dotu toyari dofiro nubuyai tuti kadidu dotu fenanai. Emadu eteyo,
 “Haleluya!

Weo tane Seng Allaio wemambiriu sewa ne,
 andino wemananu ne.

⁷ Tamararising, taparaise tuti tataparandini.

Weo rahida Domba Antung foi rirau nai fi kiawariai ampa
 tuti kadawing dauti fi meinenami kontai ampa.

⁸ Allai dohong ansung mirarebanai bua karofari tuti kaiwewa fo
 we kadawingfoi we sensung nai.”

(Ansung mirarebana nanai deinawi Allai ne inontarai emarebana fosa
 fi masio enari kariri ne dawiafo aine.)

⁹ Ainanaya wewaifo medu we yau deyo, “Woi fininai, ‘Mandoni dino
 Allai wenoti to Domba Antung foi ne muniara mandirau foi mani, sobu
 moanafo riati.’ ” Mayeai medu aha deyo, “Kaiwo ninai, kaiwo tarai na
 Allai fine.”

¹⁰ Tarahuo kaiwofo nanai, itawai aweu isangkapa awehubukane na
 arongreafo we isomi wei. Manamo medu we yau deyo, “Nana fanai! Wiro
 womi we yau fanai, weo yau kontaio Allai ne woming di yau kariri wau,
 tuti kariri nemu doroio eraria Yesusi tuti eru ne aunaufoa mutu fosa! Mae
 womi we Allai terai! Weo Allai ne kaiwoariri nabifesa emadura fo mani,
 deinawiaia kasau ampa we Yesusi mani Seng dine.”

Yesusi dautai na kuda biua manei tuti miungno andowa kerira foi

¹¹ Mayeai iwati rorafaisi tifa tuti iwati kuda biua manei tuti manei
 dautai nai. Mano dautai nai foi wonong fino *Wetarai tuti Dohong Kariri
 Allai Ne Dawiafo Na Mai*. I mani kiutu kaiwo na mai tuti memuna we
 ne aitetafosa na mai. ¹² Urengfo suru usambewarai toyari adia fiabai
 denggararu, tuti sata sapewi mananu bitoya na nungkamieifo. Soi na ne
 taraifoi wangfeai, amani wangno wiro manei siai deitawana kaha, meiri
 dino deitawana ne. ¹³ Ne ansung deuroi satari foi werika sentenang, tuti
 mantauni wonong fino *Kaiwo Allai*. ¹⁴ Rai mamuna na rorafaisi sa etautai
 na ene kuda ebaibua fosa tuti era riati. Rai mamuna nanisa ansung
 esansuna fo bua karofari tuti mirarebanai. ¹⁵ Sondu reisa bei kiawariai na
 borongfo ariei. Sondu nani dino memuna naia kiraikobu kaiwasa fuba na
 nu bodoni kontai foi tuti yu kaiwasa nanisa na ne aitatohi besi foi, amani
 yusa na tapapa. Andino ambori sahariroya anggurio deinawi kariri Allai,

mano Wemambiriu Sewa foi, ne kasoufo, na katai etahariroya angguri nai foi ne. ¹⁶Na ne ansung deufoi satari foi tuti na awedungfo, soi wang nina: *Mananu Fiabai Sewa Mananu Nunei Kiai tuti Seng Dedai Sewa seng Nunei Kiai.*

¹⁷Ainanaya iwati wewai manei doari na wofoi, tuti sahu na rawafui fiabai we romu fuba esifo na rora amau faisa deyo, “Mefanduhi mea to ninai ma, we metampi ruhiai na fiang fubao Allai dohona nei, ¹⁸ambori metangno mananufosa ene taraifoitu tuti afai mamuna babao emarareha na mamuna rorong fosa ene taraifoitu. Tuti metangno mano etautai na kuda fosa ene taraifoitu, tuti kudafosa kontai, tuti kaiwasa fuba nunei kiai, katui ete fuba, woming ete woming kaha fosa!”

¹⁹Mayeai iwati andowa kerira foi, mananu fuba nunei kiai tuti ene afai mamuna fosa, efanduhisa we emamuna we mano dautai na kuda biua foi tuti ne rai mamuna fosa. ²⁰Wape tefu andowa kerira foi tuti ne nabi tarai kaha foi. Nabi tarai kahai nini dino, raminde niari fitantuma bitoya na andowafoitu wonongfo ne. Tuti na fitantuma kerira niariri tonana foi, pempamu kaiwasa bitoyao esobu andowafoitu ne fiainawiafo na ene taraifoitu tuti esomi we ne aririwangfoitu. Tefu surua so suru urarang to Rawanang Adiao webelerang denggararu foi aweu. ²¹Mae mananu fuba fosa tuti ene afai mamuna fosa mani, mano dautai na kuda biua foi miunsa na sondu kewariai na borongfo ariei nani. Ampafe romufosa kiai esifo ma etananggoing rai nanisa ene taraifoia enemifo pising beyari.

Kristusi tuti ne inontarai feririsa fosa eru wang mananu defuina 1.000

20 ¹Mayeai iwati wewai manei biari na rorafaisi meu. Yu aisu Kamirei Berorong foi ne rahutufoitu tuti wai besi fiabai bei na warangfo. ²Ainanaya tefu tawai naga fiabai foi—tawai kerira tawa foi—amani Saminseni, mano wemananu we inggirafosa foi, wiorahia. ³Tuti soi to Kamirei Berorong foi aweu, mayeai kife rahutufoia tuti niari kobui na aisufuoi tuti saha weduari na segeli. Ambori wiwo pempamu kaiwasa na nunei ahang kaha, paria defuina piaura wering (1.000) fo kai. Wiataia defuina piaura wering foa kaia fo, wewaifoitu sawini tourai aha.

⁴Ainanaya iwati kadera mananu fo, tuti mano eminohi naya fosa esobu mambiriu we ehutu kaiwo. Iwati inontarai manea kontai enumianinufo, amani inontaraio raminde emadu kariri Yesusi tuti ewuwu Allai ne Kaiwofo wedaya kaiwasa eferangkahutu eramikanangfoa fosa. Ea mani, inontarai wiwo esomi we andowa kerira foi tuti ne aririwangfoitu kaha, tuti wiwo esobu andowafoitu ne fiainawiafo na erewomifo ete na ewaramifo kaha. Esuwi na marareha rorong foi etarang aha tuti eru wang mananu fo ria Kristusi paria defuina piaura wering (1.000). ⁵Inontaraio esuwi na marareha rorong fo we eminohi etarang defuina piaura wering nanisa deinawi mansuwi-suwi reantenang fo finana. Wape inontarai emararehao

wiro esuwi konta kaha fosa, ewatai paria defuina piaura wering foa kai akawuru wori esuwi ki. ⁶Inontarai mano esuwi na mansuwi-suwi reantenang fe nanisa emararebanai tuti Allai mioansa paria. Weo wiro esodai Marareha Weberu foi kaha. Weo Marareha Weberu foi wiro wemambiriu we kiasa kaha. Ampefe eweimami we Allai tuti Kristusi, tuti eru mananu ria Kristusi paria defuina piaura wering (1.000).

Allai miungno Saminseni tuti ne raifosa

⁷Defuina piaura wering (1.000) foa kaifo, wewaifo fiorehu wai besi fo weru Saminseni tuti sawini weru aitamu wiatai nai foi. ⁸Ainanaya Saminseni kiawariai weru katai wiatai nai foi ariei, tuti da we pempamu kaiwasa na nunei sentenang amani kaiwasa na nu fubao uwonomi Gogi tuti Magogi, tuti fianduhisa we emamuna. Kaiwasa fuba fianduhi nani ato afonsoi kaha, ne tarai toyari ninuaing na nafareng. ⁹Inontarai nanisa esinsung mai katai na nunei sentenang pariao era wa esoru katai Allai ne inontaraifosa eminohi nai foi, amani bendario enewawuti foi, we emamuna wei. Manamo Allai su adia bei na rorafaisi meu kasosara ehaia. ¹⁰Mae Saminseni, amani mano pempamusa foi, wewai manei soi to Rawanang Adia foi, amani adiao belerang denggararu foi. Katai nani dino raminde wewaifo so andowa kerira foi tuti ne nabi tarai kaha foia unayai nai ne. Na katai nani esodai dadira fiabai paria fo nai, diru rahida we fitawafa.

Aiboi wefuiai pario Allai dohonai we inontarai eharira fosa

¹¹Mayeai iwati kadera mananu fiabai biua bei, tuti Seng Allai minohi nai. Na arongreafo, rorafaisi tuti nunei unai na tantuma tuti wiro watioi na weai ahang kaha. ¹²⁻¹³Tuti iwati inontarai emarareha fosa, katui ete fuba, etoari na arongreafo. Inontarai emarareha na rawanang fosa, mano enayai na Mararehafoi tuti na Aitamu Marareha Rorong foi, inontarai nanisa kiai, era wa etoari na Allai arongreafo we kiutu kaiwo karirisa. Mayeai iwati manei fia buku soi kariri inontarai ene enari toa fo naya fo. Tuti fia buku siai bei kontai amani, Bukuo soi kariri mano esobu Waidani fosa nai foi. Ainanaya Allai dohong aiboifo we inontarai emarareha fosa kariri fianai aino soi na bukufoi kariri ene etohong toa fo nanai. ¹⁴Mayeai wewaifo so Mararehafoi tuti Aitamu Marareha Rorong foi to Rawanang Adia foi aweu. Rawanang Adia nini mani Marareha Weberu foi dine. ¹⁵Mandoni dino wonongfo watai na Buku soi kariri mano esobu Waidani fosa foi kaha mani, wenani kontai Allai soi to Rawanang Adia foi.

Nu weworu

21 ¹Mayeai iwati Rora Weworu bei aha, tuti nuneio weworu bei aha. Weo nunei bo reantenang foi niai ampa. Rawanangfo

kontai bireri ampa. ²Tuti iwati Bendari Mirarebanai, amani bendari Yeruselemi weworu foi, Allai suki na rorafaisi meu. Bendari nani ne tarai toyari kadawing mandirauo mirandinia meinenang we ne mangfoi. ³Tuti tarahuo manei sahu na kadera mananu foi deyo, “Ninaia mani katai Allai minohi nai fi wiatai rahang inontarainesa ampa. Tuti minohi riasa, ambori yuaise we ne inontaraifosa. Allai mantauni ambori weririasa tuti weSeng wesa. ⁴Ambori dufi euremikurufo weru euremifo, wiro esodai mararehafoi ahang kaha, esai ahang kaha, etaidu ahang kaha, tuti enumeruainso emaninang na weai ahang kaha. Weo fi kiaio mamo foi niai ampa.”

⁵Ainanaya mano minohi na kadera mananu foi medu deyo, “Boti ma! Ninaia mani inari fi fuba nini kiai weworu!” Tuti medu tubarai aha deyo, “Woi fianai aino imadurai we wau mau nanai, weo kaiwo nanai tarai tuti masi we meroasoai.”

⁶Mayeai medu we yau aha deyo, “Kai ampa! Yau mani, *Alfa* tuti *Omega* di yau, yau kontaio *Reantenang Pari* tuti *Fui Pari* di yau. Mandoni dino arongtataha mani, ambori yohong merehafo dunung ki, tuti mereha nanai yohong aroratai na waya urengno dohong kaiwasa eminohi etarang we fitawafa foi. ⁷Mandoni dino doara mutu dirapa Saminseni mani, wenani sobu finanai kai ria yau ki, tuti ambori iruaise we nehu kaisung tuti iweSeng wei ki. ⁸Wape mano ematai we enari ne mai fosa, mano eroaso kaha fosa, mano enari sasari kerira fosa, mano emung inontarai fosa, mano emaninawa funoma fosa, mano eha rawang fosa, mano esomi we seng tarai kaha fosa, mano etatofa biriu fosa, kaiwasa kerira fuba nani kiai ambori iso sa to Rawanang Adia webelerang denggararu foi aweu. Rawanang Adiai nani mani, Marareha Weberu foi dinani.”

Yeruselemi weworu foi

⁹Ainanaya wewai wefui ai pari foi, na wewai ituo eru rewanguai wenofi beitu sefang na Allai ne aiboi beitu fo, da ma medu we yau deyo, “Ro ma, ambori tura wa yeinawio Kadawing Mandirau foi we wau, amani Domba Antung foi ne wiwingno ambori dauti foi we wau.” ¹⁰Ampafe Allai Nuaninufoi sensoni yau tuti wewaifo kia yau to uai fiabai dedai beia. Na wanai deinawi Bendari Mirarebanai we yau, amani Yeruselemi. Bendari nani biari na rorafaisi na Allai arongreafo meu. ¹¹Allai ne sambewaraio dadai fo wedaya bendarifo keiwewa toyari kamieio keiwewa ne harga dedai esahui we intani, tuti memarampoti toyari kasinai. ¹²Bendarifo ne taba kamieio dawariri foi fiabai tuti dedai, tuti ne rahutu suraya boru, wewai ewesuraya mandu ewaitawang weduarai na rahutu suraya boru nanai, amani mansiari-mansiari deitawang wedua rahutu bei. Tuti esoi inontarai Israeli fosa ewonomifo kariri ene riria suraya boru fo maino rahutu suraya boru fo, amani rahutu bei riria bei,

rahutu bei aha mani riria bei. ¹³Rahutu suraya boru nanai, botoru arong to do wanang murang foi, botoru arong to do wanampui foi, botoru aha mani arong to do wanansai foi, tuti botoru arong to do wanamba foi.

¹⁴Taba kamiei foi ebauni sau kamiei suraya boru. Na kamiei suraya boru nanai, esoi Domba Antung foi ne rasuli suraya mandu fosa ewonomifo nayai, amani mansiari-mansiari wonongfo na kamiei bei.

¹⁵Wewai medu we yau nani, yu aitung enariri na emasi bei we titua bendarifo, ne taba dawariri foi tuti ne rahutufu, nayai. ¹⁶Bendarifo wiatafo weaburuniai, amani deuroifo masi kariri tebafoi. Ampafe tituatia mani ne deuroifo deuroio stadia 12.000, amani kilometeri 2.200, tonanai kontai we ne tebafoi tuti ne dedaifo. ¹⁷Mayeai titua taba kamiei foi aha mani, kehubang hasta 144, amani meteri piatorua wonang (66). Weo wewaifo ne tituafo kariri todoni inontaraine etituafi fo. ¹⁸Taba kamiei nani enariri na kamiei keiwewa ne harga dedai esahui we intani, mae bendarifo mantauni na emasi denteng pari foi. Emasi nani memarampoti toyari kasinai. ¹⁹Kamiei ebaung tabafoi sauwi foi mani, na kamamieio keiwewa tuti ne harga dedai ureng suraya boru.

Amani kamiei ureng bo reantenang foi mani, na kamiei intani memarampoti,

bo boru foi na kamieio kehe rawanang esahui we nilami,

bo botoru foi na kamiei kehe rawanang tuti kehe ai reraung esahui we mirahi,

bo boa foi na kamieio kehe ai reraung esahui we zamrudi.

²⁰Mae kamiei bo ring foi na kamiei berika tuti biua esahui we unami,

bo wonang foi na kamiei berika esahui we sardisi,

bo itu foi na kamiei bemining emasi esahui we ratna cempaka,

bo indeatoru foi na kamiei kehe adareti toyari mansoari aibong, esahui we berili,

bo indeata foi na kamiei bemining esahui we topasi,

bo sura foi na kamiei kehe bemining esahui we krisopasi,

bo suraya boyari foi na kamiei kehe toyari rawanang baba esahui we lazuardi,

mae kamiei bo suraya boru foi na kamieio kehe werawanderi foi esahui we kecubung.

²¹Rahutu suraya boru fo na mutiara suraya boru, ampafe rahutu bei mani na mutiara fiabai bei, rahutu bei aha mani tonanai kontai. Mae bendarifo ne rang fuba fo mani na emasio denteng pari fo, emasi nani memarampoti toyari kasinai.

²²Seng Allai mano Wemambiriu Sewa foi tuti Domba Antung foi uminohi na bendarifo, ampafe iwati Seng Allai ne Munufoi na bendarifo kaha, weo Munu nani bireri ampa. ²³Bendari nani wiwofoi ete embaifo sambewari kaha, tonanai ki wape wiwo memantiti na wea

kaha, weo Allai ne sambewaraio dadai fo aino sambewari ne, tuti Domba Antung foi andino ne tarai wepadamarang sambewari konta ne. ²⁴Kaiwasa na doni kontai na nunei, ambori era na sambewaraio na bendarifo nani ki, tuti mananufosa kontai ambori eha ene rafoi to bendarifo ki. ²⁵Rahutu to bendarifo afui nani wirow kafei na wea kaha, mae tifa pampang na rahida neungne, weo katai nani wirow diru na weai ahang kaha fefe. ²⁶Kaiwasa fuba nunei kiai ambori era wafui we etaparanding Allai tuti Domba Antung foi tuti esomi we suru nai. ²⁷Wape mano enari fi kiai mamaya fosa, ete mano epampamu fosa, ete tanang tofino mano enari fi werarika fo, inontarai nanisa wirow esuai to bendarifo afui kaha. Mae mano esuai afui fosa mani, mano ewonomifo watai kawuru na Domba Antung foi ne Bukuo soi kariri mano esobu Waidani fosa foi.

Waya kiai mai

22 ¹Mayeai wewaifo deinawi waya rowei we yau, wayao ne merehafoi manei dunumi mani minohi darang wenumainu dine. Wayafoi memarampotia wati tauremi nai toyari kasinai fenanai, tuti deda na kadera mananuo Allai tuti Domba Antung foi uminohi naya fo ariei. ²Deda ariei mani deda riria rang fiabai foi rabuang tahi fo na bendarifo. Aio bongfoi kaiwasa etani mani eminohi etarang we numainufoi, doa na wayafoi eneung dowani tuti donini. Defuina bei mani webong we besuraya beru, amani embai bei mani webong we beyari. Mae reraungfoi kaiwasa na nunei kiai ehari we enari ene maninangfoi nai. ³Ampafe fiani kontai aino Allai deikangganai fo, wirow nayai na bendarifo kaha. Allai tuti Domba Antung foi ambori une kadera mananu foi wiatai na bendarifo, tuti Allai ne womingfosa ambori efatari ki. ⁴Ewati te Allai urengfo tuti soi wonongfo na erewomifo ki. ⁵Katai nani wirow diru na weai ahang kaha tuti wirow etohong we wofoi tuti padamarangfoi we sambewasa ahang kaha. Weo Seng Allai mantauni andino ne tarai we wo tuti padamarang we sambewasa ne. Tuti ambori eru wang mananu fo we fitawafa.

Seng Yesusi daraberahi aha ma fo

⁶Ainanaya wewaifo medu we yau deyo, “Kaiwo fuba taramuoi kiai nini, kaiwo tarai fine tuti masi we meroasoai. Seng Allai mano sensoni ne nabifosa na Nuaninu Mirarebana foi, demi ne wewaine yau kawuru ma we yeinawiai we wau kariri fianai aino katu wo kawaria fo, ambori woi kaririai we ne womingfosa.”

⁷Yesusi medu deyo, “Metarami ma! Yemang ahang kahai mae ira ahera mau. Mandoni dino dohong kariri kaiwo fuba dotu na bukufi nini mani, sobu moanafo.”

⁸Tuti fi fuba nini kiai, yau Yohanesi, tarahu terai na tarahune tuti iwati terai na urehune kontai. Tarahuwai tuti iwati fi fuba nini kaifo, itau aweu isangkapa awehubuka na wewaio deinawi finanai we yau foi arongreao we isomi wei. ⁹Manamo medu we yau deyo, “Nana fanai! Weo yau kontao Allai ne woming di yau kariri wau, tuti kariri nemu doroio ewenabi fosa tuti kariri kaiwasa fubao etohong kariri kaiwo areraio watai na bukufi ninisa. Ampefe womi te we Allai.”

¹⁰Ainanaya medu we yau aha deyo, “Wiro bodiwa kaiwo watai na bukufi nini fanai, weo rahidafe kikeu ampa, we fininai ambori kawariaifa.

¹¹Mandoni dino niari ne karirafo mani,
niari pampangna,
tuti mandoni dino niari fi werarika fo mani,
tawing wenani niari pampang kontao.
Mandoni dino niari fi mai fo mani,
wenani todoni kontai dohong kaririai pampang.
Kontai mandoni dino mirarebana mani,
wenani todoni kontao mirarebanai pampang.”

¹²Yesusi medu deyo, “Metarami ma! Yemang ahang kahai mae ira ahera mau, ira tuti fiembaitane we yohonai we mansiari-mansiari kariri fi niari fo. ¹³Yau mani *Alfa* tutu *Omega* di yau, yau kontao *Reantenang Pari* tuti *Fui Pari* di yau.

¹⁴Mano eruai ene ansungfo ambori mararebana fosa mani, esobu moanafo ria Allai. Ea mani ambori Allai yoa wesa we etangno aibong na aio dohong kaiwasa eminohi etarang we numainu foi ki, tuti esuayai na rahutu fiabai foi to bendarifo afui ki. ¹⁵Wape inontarai mano emasi we ahusa we fiawera fosa, amani mano eha rawang fosa, emaninawa funoma fosa, emung inontarai fosa, esomi we seng tarai kaha fosa, epampamu na kaiwo emadura fo tuti na etohong toa fosa, kaiwasa fuba nani kiai enayai na borieifo.

¹⁶Yau, Yesusi, yenatu nehu wewaifi we mea meu wa, we deisaha kariri fi fuba nini we jematiwai kiai ampa. Yau mani *Riria Na Dauti* di yau, tuti yau mani awaha *Ampario* denggarau fiabai foi di yau.”

¹⁷Allai Nuaninufoi tuti Domba Antung foi ne Kadawing Mandirau foi umadu we Seng Yesusi ureyo, “Ro ma!” Tuti mandoni kontao tarao kaiwone mani todoni kontai medu deyo, “Ro ma!” Mandoni dino arongtataha tuti mandoni dino miaya mani da ma kia mereha wedaya kaiwasa eminohi etarang we fitawafa fo we dunung. Mereha nanai kia arorataifa, wirow biaita kaha.

Kaiwo arera wefuiwai pari kariri kaiwo na bukunei

¹⁸Yau Yohanesi yeretawanaia mutu toninai we mandoni kontai andino tarao kaiwo watai na buku isoi fininai, kariri fianai aino ambori kawaria

fo, amani yeretawanai tonina; Masino manei medu seru kaiwofeai siai weru kaiwo nina mani, Allai ambori dohong seru aiboi fimungno watai na ne bukufi ninai kontai wei ki. ¹⁹Tuti manei medu ta weaifa ete fefora weaifa mani, Allai kontai kiutu fiembaitaio deretawanai na buku fininai wei kontai ki, amani wiro sobu katai we minohi na bendari mirarebana foi kaha, tuti dang aibongno manei dani mani wedayari minohiarang we numainufoi kaha foi.

²⁰Mano medurai we kaiwo ninai kiai mani kaiwo tarai fine foi deyo, “Yo! Wiro yemang ahang kahai mae, ira ahera mau!” Antu! Seng Yesuse, ro ahera ma!

²¹Kadono Seng Yesusi dohong ne bengfo arora we Allai ne inontarainesa kiai! Antu!